


# FAAEEINA I LE MANA MAI LUGA

SEMINA FAASAUNIUNI MO LE MALUMALU



TUSI LESONA A LE FAIAOGA


# FAAEEINA I LE MANA MAI LUGA

SEMINA FAASAUNIUNI MO LE MALUMALU

TUSI LESONA A LE FAIAOGA


Lolomiina e  
Le Ekalesia a Iesu Keriso o le Au Paia o Aso e Gata Ai  
Aai o Sate Leki, Iuta

© 1995, 2003 e le Intellectual Reserve, Inc.  
Ua taofia aia tatau uma  
Lomiga lona lua 2003  
Lolomiina i le Iunaite Setete o Amerika  
Faamaonia le FaaPeretania: 3/03  
Faamaonia le faaliliuga: 3/03  
Faaliliuga o le *Endowed From On High: Temple Preparation Seminar*  
Samoan



## FAASINO MATAUPU

Folasaga	iv
1. E Aoa mai le Malumalu e uiga i le Fuafuaga Sili o le Faaolataga	1
2. E Tatau Ona Tatou Agavaa e Ulufale Atu i le Malumalu	6
3. O Galuega i le Malumalu e Aumaia ai Faamanuiaga Sili i o Tatou Olaga	13
4. O Le Mauaina o Sauniga ma Feagaiga o le Malumalu	17
5. O Le Aoa Mai i le Alii e Ala i Faatusa	22
6. Saunia e Ulufale Atu i le Malumalu Paia	28
7. Ia Faaauau Pea ona Olioli i Faamanuiaga o le Auai i le Malumalu	33



---

## FOLASAGA

### FAAMOEMOEGA

O lenei mataupu e aoaoina ua fuafua e fesoasoani ai i tagata O Le Ekalesia a Iesu Keriso o le Au Paia o Aso e Gata Ai ia saunia mo le mauaina o ni pepa faataga o le malumalu ma auai atu i le malumalu. O tagata o le Ekalesia ua auai atu i le malumalu e mafai foi ona aveina le vasega ina ia aoao atili ai e uiga i le malumalu.

### O TAGATA E AUAI

O tagata e auai i lenei vasega e tatau ona mananao e o i le malumalu ma ia agavaa mo se pepa faataga o le malumalu. Afai latou te lei mauaina lava se pepa faataga, ua tatau loa ona sauniuni ina ia maua.

Afai o tagata auai latou te lei avea lava se vasega o le Aoga Sa e talanoaina ai le tusi lesona o *Mataupu o le Talalelei*, ua fautuaina, ae e le manaomia, ina ia auai i se vasega o le Aoga Sa e talanoaina ai le tusi lesona o *Mataupu o le Talalelei* ao lei amataina lenei vasega. Ao lei aveina lenei vasega, e ao ona i ai so latou malamalamaaga lelei i mataupu faavae ma mataupu autu o le talalelei ma se naunautaiga e ususitai i poloaiga a le Atua, e pei o le tulafono o le legavia, tausia o le Aso Sapatu ia paia, o le Upu o le Poto, ma le tulafono o le sefuluui. O le agavaa ma le taumafai ma le amiotonu o le tagata lava ia o mea ia e moomia mo le auai i sauniga o le malumalu.

I lalo o le taitaiga a le epikopo po o le peresitene o le paranesi, e mafai e le aufono a le uarota po o le paranesi ona talanoaina ni auala e faaoga ai le vasega e avea o se vaega o a latou taumafaiga e faamalolosia ai aiga ma fesoasoani ai i alii e saunia mo le mauaina o le Perisitua Mekisateko.

E tatau i tagata taitoatasi e auai ona maua sona lava valaaulia e auai i le vasega mai le epikopo po o le peresitene o le paranesi po o se isi taitai o le Perisitua Mekisateko i totonu o le uarota po o le paranesi.

### TAIMI MA LE NOFOAGA

E mafai ona fesuisui ai le toatele o tagata o lenei vasega, ae peitai e tatau lava ona aoao atu i vaega toalaiti i tulaga faaleuaroa po o paranesi. E mafai ona faia vasega i le falelotu po o le fale o se aiga. O le nofoaga, taimi ma le pe faafia ona fai o lesona, e tatau ona fetau mo tagata e auai faapea foi ma le faiaoga.

Ua vaevaeina aoaoga i ni lesona se fitu. Ae peitai, e ao i faiaoga ona faaalu se taimi tele e pei lava foi o manaoga o tagata o le vasega i

lesona taitasi. Atonu e manaomia ai le sili atu nai lo le tasi se piriota mo lesona taitasi.

### **O MEA E FAAAOGAINA E LE VASEGA**

E tatau i tagata taitoatasi o le vasega ona aumai ia tusitusiga paia i le vasega. E tatau i tagata taitoatasi ona i ai se kopi o le tamaitusi *Saunia e Ulufale atu i le Malumalu Paia* (36793), o le tusi faaopoopo lena a le tagata o le vasega mo lenei mataupu. E faaaoga soo i lesona uma, ma e tatau ona faatonuina tagata o le vasega e faitau i vaiaso e fai ai le vasega.

### **FAIAOGA**

E mafai ona tofia tagata taitoatasi po o ulugalii ua faaipoipo e faiaoga i lenei vasega. E tatau i faiaoga ona i ai ni molimau malolosi o le talalelei ma ia malamalama i uunaiga a le Agaga. E tatau ona avea i latou ma ni tagata ua maua faaeega paia o loo i ai ni pepa faataga o le malumalu i le taimi nei ma e malamalama i le taua ma le paia o mea o loo faia i le malumalu.

Afai e talafeagai ai, e tatau i le faiaoga ona o faatasi ma tagata auai o le vasega i le malumalu pe a oo ina maua o latou sauniga o le malumalu.

### **FAUTUAGA MO LE FAIAOGA**

Ao lei ulufale atu tagata o le Ekalesia i le malumalu, e tatau ona latou saunia faaleagaga. O se vaega o lenei sauniuniga, e tatau ona lava lo latou malamalama i mataupu e faatatau i le ata o le faaolataga ma galuega faalemalumalusa. Ua ia te oe le avanoa taua e fesoasoani ai i isi i lenei sauniuniga, lea e tau atu ai i se tasi o aafiaga aupito paia o o latou olaga. Ia malamalama i uunaiga a le Agaga ina ia mafai ai ona e tuuina atu le lesona i se auala e sili ona lelei mo tagata auai. Ia manatua le fautuaga a le Alii: “O le a tuuina atu foi le Agaga ia te outou i le tatalo i le faatuatua; a e afai tou te le maua le Agaga aua tou te aoao atu” (MFF 42:14).

Ia faitau le tusi lesona lenei mai le amataga seia oo i le faaiuga ao lei faia le lesona muamua ina ia e malamalama ai pe faapefea ona fesootai lelei mea e faaaogaina. Ia vave saunia lesona taitasi ao lei taitai oo i le taimi e faia ai ina ia e malamalama i manatu ma mafai ai ona lelei le tuuina atu. Ao e aoaoina atu le lesona, ia mautinoa ua malamalama atoatoa tagata e auai, i manatu ao lei faaauauina. Aua le faanatinatia ia lesona. Ia onosai ma faataga tagata auai e mafaufau i savali ma tali atu i ai.

Ao lei faia lesona taitasi ma soo se taimi lava ao faia ia lesona, ia tuuina atu avanoa mo tagata o le vasega e fai ai fesili ma talanoaina

manatu. Fesoasoani ia i latou e faaoga i o latou olaga ia mataupu faavae ua latou aoaoina. Ia tali fesili e ala i le faaogaina o mau, aooga a perofeta o aso e gata ai, ma le taitaiga a le Agaga o le Alii.


I le gasologa o lenei vasega atoa, ia manatua le natura paia o sauniga o le malumalu. E pei ona faamalamalamaina i le faamatalaga ua taua i lalo, o nisi vaega o galuega faalemalumalu e le talanoaina i fafo o le malumalu:

“Tatou te le talanoaina sauniga o le malumalu i fafo o le malumalu. E lei faamoemoeina le malamalama o sauniga o le malumalu, mo na o ni tagata filifilia toaitiiti, pe latou te taofia foi mai isi. O le mea moni e le o lena. Faatasi ai ma taumafaiga silisili matou te uunaia ai agaga uma ina ia agavaa ma saunia mo aafiaga i le malumalu. . . .

“E faigofie ia faagasologa ma sauniga o le malumalu. E matagofie. E paia lava. E le faalauaitelina o lea e le mafai ai ona tuuina atu ia i latou e lei saunia” (*Saunia e Ulufale Atu i le Malumalu Paia*, 2).

Ia galue ia faamalasia lau lava molimau o le malumalu, ma ia e molimau soo atu i lau vasega e uiga i le moni o mataupu faavae o loo e aoaoina atu. Ia faapea foi ona tuuina atu ni avanoa mo tagata o le vasega e tuuina mai ai a latou molimau pe a talafeagai.

Ia manatua e le aunoa le taua o galuega faalemalumalu. Na saunoa mai Elder Boyd K. Packer e faapea: “O sauniga ma feagaiga e avea ma o tatou tusi faamaonia mo le ulufale atu i Lona afioaga. Ina ia agavaa mo le mauaina o na tusi faamaonia o se taumafaiga lea i le olaga atoa; o le tausaiaina pe a maea ona mauaina o le luitau lea o le olaga faaletino” (i le Conference Report, Ape. 1987, 27; po o le *Liahona*, Iulai 2001, 39).



## E AOA O MAI LE MALUMALU E UIGA I LE FUAFUAGA SILI O LE FAAOLATAGA

*“O le ola e  
faavavau foi lenei,  
ia latou iloa oe  
le Atua moni e  
toatasi, atoa ma  
le ua e auina mai,  
o Iesu Keriso lea”  
(Ioane 17:3)*

### FAAMOEMOEGA

Ina ia fesoasoani i tagata o le vasega ia malamalama o loo aoaoina i totonu o le malumalu le ata o le faaolataga.

### SAUNIUNIGA

1. Ao lei amataina le vasega, ia saunia se laupapa po o se pepa lautele ua tusia ai se ata e lei maea o loo faailoa mai ai le ata o le faaolataga (tagai itulau 3). (Atonu e te manao e faia se ata faapena i luga o ni fasipepa mo tagata taitoatasi o le vasega ina ia faamaeaina i le taimi o le talanoaga a le vasega.)
2. Ia mautinoa e tofi tagata o le vasega ma tusitusiga paia. Ia tuu atu foi i ai ma se kopi o le tamaitusi *Saunia e Ulufale Atu i le Malumalu Paia* mo tagata taitoatasi o le vasega. E tatau ona okaina nei tusi o se vaega o mea e faaaogaina e le vasega.
3. Atonu e te manao e tofi nisi o le vasega e fesoasoani ia te oe i le vaega lona lua o le lesona. E mafai ona e tuuina atu mau o loo taua i lalo o vaega taitasi o le ata o le faaolataga (muai olaga, o le Pau, ma isi.) i se tasi o le vasega ma fai i ai e sau saunia i le vasega e ootoo mai po o a mea o loo aoaoina mai e nei mau e uiga i le ata o le faaolataga.
4. Afai e maua le kaseti vitio *Phase 1 Video* (5X779), atonu e te manao e faaali le “O le Sailiga a le Tagata i le Fiafia,” o se ata e 13-minute le umi.

### TUUINA ATU O LE LESONA

#### O LE MALUMALU O SE AOGA FAALEAGAGA

Tofi se tasi e faia le tatalo amata.

Ia faamalamalama atu o le a faaaogaina tusitusiga paia i lesona taitasi. Ia uunaia tagata o le vasega e aumai a latou tusitusiga paia i vasega taitasi.

Tufatufa atu kopi o le *Saunia e Ulufale Atu i le Malumalu Paia* i tagata taitoatasi o le vasega. Faamalamalama i ai o le tusi faaopoopo lenei mo le vasega. O le a talanoaina faamatalaga mai le tamai tusi i lesona uma, ma e tatau i tagata taitoatasi o le vasega ona faitau le tamaitusi ao faagasolo vaiaso e aoaoina ai le vasega.



Ia amata le lesona i le faamatala atu o le malumalu o se aoga faaleagaga lea e fesoasoani ia i tatou e aoao atili ai e uiga i le faamoemoega o le olaga ma le ata o le faaolataga.

Ia faitau e tagata o le vasega upusii o loo i lalo, o loo faapupulaina ai nisi o mea tatou te aoaoina i le malumalu:

Ua saunoa mai Peresitene Gordon B. Hinckley o le malumalu “ua avea ma faleaoga o aoaoga o mea matagofie ma paia a le Atua. O iinei ua faamatala mai ai mo i tatou le fuafuaga a le Tama alofa mo Ona atalii ma afafine o augatupulaga uma. O iinei ua tusia ai i o tatou luma le tala o le faigamalaga e faavavau a le tagata mai le muai olaga e oo mai i lenei olaga seia oo atu i le olaga a sau. O upu moni taua aoao ma upu moni faavae ua aoaoina lelei ma manino ma faigofie ona malamalama ai tagata uma e faalogo i ai” (“O le Malumalu o Sate Leki,” *Liahona*, Nov. 1993, 6).

Sa aoao mai Peresitene Polika Iaga e faapea o sauniga o le malumalu ua taua o le faaeega paia e aumai ai ia i tatou aoaoga e talafeagai mo le ola e faavavau: “O lou faaeega paia, o le mauaina uma lea o sauniga na, i le maota o le Alii, lea e tata ai mo oe, pe a e tuua lenei olaga, ina ia mafai ai ona e toe savali atu i le afioaga o le Tama” (*Discourses of Brigham Young*, filifilia e John A. Widtsoe [1954], 416).

Ia faitau e le vasega le Ioane 17:3.

- O le a le mea o loo aoao mai e lenei mau e uiga i le ituaiga malamalama sili ona taua e mafai ona tatou maua?

*“Ma o le a tatou tofotofo ai i latou, ia iloa ai, pe latou te faia mea uma e poloaiina ai i latou e le Alii lo latou Atua” (Aperaamo 3:25).*

Faamatala atu o totonu o le malumalu, tatou te aoao atili ai e uiga i le Tama Faalelagi ma Iesu Keriso, ma e mafai ona tatou ola latalata atu ai ia i Laua. Tatou te aoao ai e uiga i la Laua fuafuaga mo i tatou, lea o loo taua i tusitusiga paia i faaupuga eseese e pei o le ala o le togiola po o le ata o le faaolataga.

- O a ni mea ua fesoasoani ia te oe e aoao ai e uiga i le ata o le faaolataga i lou olaga?
- E faapefea ona avea lou malamalama i le ata o le faaolataga ma faamanuiaga i lou olaga?


### **O TOTONU O LE MALUMALU, E AOAONA AI I TATOU I LE ATA O LE FAAOLATAGA**

Ia faamalamalama atu faapea o se vaega o le faaeega paia i le malumalu, e aoao ai le ata o le faaolataga. O lenei vaega o le lesona o le a fesoasoani i tagata o le vasega e sauniuni ai ina ia malamalama i nei aoaoga i totonu o le malumalu.

Tagai i le ata tusi e lei maea o loo i le laupapa ma toe faamanatu faamatalaga o loo mulimuli mai ai, ia faaoga ai mau e fesoasoani ai i tagata o le vasega ina ia malamalama i manatu. A o talanoaina mau,

ia tusia i laina talafeagai i luga o le siata (tagai i le siata ua maea o loo i le itulau e 5). Afai o i ai ni kopi o le siata a tagata o le vasega, ona fetagofi lea e faaopoopo i ai ma mau i a latou siata.

Afai na e tofiaina ni tagata o le vasega e fesoasoani ia te oe, fai i ai e aumai a latou faamatalaga e uiga i le ata o le faaolataga. Ia faamalamalama atu faapea i ai o lenei talanoaga o le a taliina ai fesili nei: O fea na tatou o mai ai? Aisea ua tatou o mai ai i lenei lalolagi? O fea tatou te o i ai pe a mavae lenei olaga?



### ***Muai Olaga***

1. O i tatou o fanau agaga a le Atua, lo tatou Tama Faalelagi, ma sa tatou nonofo faatasi ma Ia ae tatou te lei o mai i le lalolagi (tagai Roma 8:16–17).
2. Na valaauina e le Tama Faalelagi se fono tele i le lagi (tagai Aperaamo 3:22–23). Sa ia tuuina mai se fuafuaga mo lo tatou alualu i luma e faavavau ma le fiafia, lea ua taua o le ata o le faaolataga. Sa tatou filifili e mulimuli i Lana fuafuaga.
3. Ina ia o gatasi ma le fuafuaga, o Iesu Keriso, le Alo Ulumatua o le Tama Faalelagi, sa ofo atu e avea ma o tatou Faaola (tagai Mose 4:2; Aperaamo 3:27).
4. O Lusifelo, o le isi atalii o le Atua, sa tetee i le fuafuaga a le Tama Faalelagi ma taumafai e aveesea le filifiliga saoloto o le tagata." Sa tuliesea o ia ma e na mulimuli atu ia te ia mai le lagi ma o le a le mafai lava ona i ai sona tino faaletino ma iloa le olaga nei. I le gasologa o tausaga, sa taumafai Satani, ua faaigoa ai nei Lusifelo, ina ia le fiafia le tagata e pei lava o ia e ala i lona faaososoina lea o i latou ina ia amioleaga (tagai Mose 4:1, 3–4; 2 Nifae 2:17–18).

### ***O Le Pau***

1. Sa filifilia Atamu ma Eva e avea ma uluai fanau a le Tama Faalelagi e o mai i le lalolagi ma sa tuuina i laua i le Faatoaga o Etena. I lena taimi, e lei faaletino o laua tino (tagai Mose 3:7–8, 21–23).

2. Sa filifili Atamu ma Eva e aai i le fua o le laau na faasaina e le Atua i laua e aua le aai ai. O le taunuuga, sa vavaeeseina mai i laua mai le afioaga o le Atua. O lenei vavaeeseina e taua o le oti faaleagaga. Na avea i laua ma tagata faaletino, o lona uiga o le a oo ina oti o laua tino faaletino. Ma ua faapea foi ona mafai ona la fanauina ni fanau. O le suiga i le tulaga faaletino ua taua o le Pau (tagai 2 Nifae 2:19–25; MFF 29:40–41).

### ***Olaga Faaletino***

1. O i latou uma na filifili i le muai olaga e mulimuli i le fuafuaga a le Tama Faalelagi, e maua se tino faaletino e ala i le fanau mai lea i lenei lalolagi. I le taimi o lo tatou olaga faaletino, e tofotofoina ai i tatou ina ia iloa ai pe o tatou naunau e ola i le faatuatua ma le ususitai i poloaiga a le Tama Faalelagi i le taimi lea tatou te le o faatasi ai ma Ia (tagai Alema 34:32; Aperaamo 3:24–26).
2. O le olaga faaletino, e saoloto ai tagata taitoatasi e filifili pe mulimuli o ia i le Atua pe mulimuli ia Satani (tagai 2 Nifae 2:27).

### ***Oti ma le Toetu***

1. A tatou oti, ona o ai lea o o tatou agaga i le lalolagi o agaga, ae tumau ai pea o tatou tino i le lalolagi. O lenei vaitaimi o le tuueseeseina e faaauau pea seia oo i le taimi tatou te toetutu ai. O agaga o e amiotonu e ulufale atu i le nofoaga o le filemu ma le fiala, e taua o le parataiso. O agaga o e amioleaga e ulufale atu i se nofoaga o le pogisa, lea ua taua i nisi taimi o le falepuipui (tagai Alema 40:9–14; tagai foi 1 Peteru 3:19).
2. O le Togiola ma le Toetu o Iesu Keriso ua saunia ai se ala mo tagata uma e faatoilaloina ai le oti faaletino e ala i le toetu. O le toetu o lona uiga o o tatou agaga ma tino ua faaatoatoaina, o le a toe tuufaatasia mo le faavavau (tagai 1 Korinito 15:22; 2 Nifae 9:10–13; Alema 11:42–44).
3. O le Togiola a Iesu Keriso ua maua ai le auala mo i tatou e faamagaloina ma faamamaina ai mai agasala ina ia mafai ona tatou nonofo i le afioaga o le Atua. Na puapuagatia le Faaola i le Faatoaga o Ketesemane ma luga o le satauro mo agasala a tagata uma. O le taunuuga o Lana Togiola, ua mafai ona tatou salamo ai mai a tatou agasala ma maua ai le faamagaloga. Ao tatou ola ai i le talalelei, e mafai ona tatou agavaa e maua le meaalofa o le ola e faavavau ma avea ai faapei o Ia (tagai Mosaea 3:5–12).

*“Matou te talitonu e faaolaina tagata uma lava i le Togisala a Keriso pe a tausia poloaiga ma sauniga o le Talalelei”  
(Mataupu Faavae o le Faatuatua 1:3).*

### ***Malo o le Mamalu***

I le taimi o le toetu, o le a tofia tagata taitoatasi i se malo o le mamalu. O i latou o e amiotonu o le a fai mo latou tofi le olioli ma faamanuiaga silisili nai lo i latou o e sa le ususitai i poloaiga a le Atua (tagai 1 Korinito 15:35, 40–42).

1. O le mamalu Telesitila e mo i latou o e lei mauaina le talalelei a Iesu Keriso po o le molimau a Iesu po o perofeta a le Atua, ma i latou o e ola i ni olaga agasala (tagai MFF 76:81–88, 98–103).
2. O le mamalu terasitila e mo tagata faamamaluina o le lalolagi o e na faaseseina faapea ma i latou o e na le totoa i le molimau ia Iesu Keriso (tagai MFF 76:71–79).
3. O le mamalu selesitila ua faapolopolo mo i latou o e usiusitai i poloaiga ma maua sauniga, ua faatoilaloina mea uma e ala i le faatuatua ia Iesu Keriso, ma lotomama (tagai MFF 76:50–70).

Fai atu i tagata o le vasega e tali mai i fesili nei:

- O le a se mea ua e aoaoina e uiga i le ata o le faaolataga lea e te lei iloa ina muamua?
- O le a sou lagona pe a e mafaufau e uiga i le matafaioi a Iesu Keriso i lenei fuafuaga sili?
- E mafai faapefea ona tatou faaali atu i le Tama Faalelagi ma Iesu Keriso lo tatou agaga faafetai mo la Laua fuafuaga?


Ina ia faamamafa atu le taua tele o le Togiola a le Faola i le ata o le faaolataga, tusi le mataupu faavae lona tolu o le faatuatua i lalo ifo o le siata ua maea e pei ona faalia.

### FAAIUGA

Ia faamamafa atu o le malumalu e maua mai ai lo tatou malamalama e uiga i lenei fuafuaga, le malamalama lea e aumaia ai faamanuiaga silisili i o tatou olaga. Ia tuuina atu lau molimau e uiga i faamanuiaga ua e mauaina ona o lou malamalama i le ata o le faaolataga ma ola ai i mataupu faavae o le talalelei.

Atonu e te manao e faaiu i le faaali o le ata “O Le Sailiga a le Tagata mo le Fiafia.”

Tofi se tasi e faia le tatalo faaiu.



*“Matou te talitonu e faaolaina tagata uma lava i le Togisala a Keriso, pe a tausia poloaiga ma sauniga o le Talalelei” (Mataupu Faavae o le Faatuatua 1:3).*



## E TATAU ONA TATOU AGAVAA E ULUFALE ATU I LE MALUMALU

*“O le faanaunauga  
sili lena o lou loto,  
ia mafai e tagata  
uma o le Ekalesia  
ona agavaa mo le  
malumalu. Ou te  
faamoemoe ina  
ia mafai e tagata  
matutua uma  
ona agavaa—ma  
tauaveina—se  
pepa faataga o le  
malumalu o aoga  
i le taimi nei”  
(Peresitene Howard  
W. Hunter).*

### FAAMOEMOEGA

Ina ia fesoasoani i tagata o le vasega ia malamalama e tatau ona latou agavaa e ulufale atu i le malumalu.

### SAUNIUNIGA

1. A o lei taitai ona faia lenei lesona, ia valaaulia mamao atu le epikopo po o le peresitene o le paranesi ina ia tuuina atu le faagasologa o le mauaina o se pepa faataga o le malumalu. O loo maua mea ua fautuaina e faaogaina i lenei aoaoga i itulau 10–11 i le vaega “O le Faagasologa o le Mauaina o se Pepa Faataga o le Malumalu o se Faamanuiaga.” Afai e le avanoa le epikopo po o le peresitene o le paranesi, e mafai ona e talosagaina se tasi o ona fesoasoani e faia lea aoaoga.
2. Tusi le upusii lenei i luga o le laupapa po o se pepa lautele: “Ou te valaau atu i tagata uma o le Ekalesia ia ola mauai sili atu e tusa ma le soifuaga ma faataitaiga a le Alii o Iesu Keriso” (Peresitene Howard W. Hunter, i le Conference Report, Oke. 1994, 7; po o le *Liahona*, Ian. 1995, 8).

### TUUINA ATU O LE LESONA

Tofi se tasi e faia le tatalo amata.

Fesili atu i le vasega pe i ai ni fesili. Ia faaalu le taimi e manaomia e tali ai fesili i le mea sili e te mafaia ma e pei ona taitaiina ai e le Agaga o le Alii. Ia manatua e i ai nisi vaega o galuega faalemalumalu e le tatau ona talanoaina i fafo o le malumalu.

Ia faamalamalama atu faapea o i latou o e ulufale atu i le malumalu e tatau ona faaalua lo latou faatuatua i le Tama Faalelagi ma Iesu Keriso e ala i le ola ai i le talalelei ma tausia poloaiga. E tatau ona latou mama i amioga, totogi se sefuluai atoa, usitaia le Upu o le Poto, tausia ia paia le Aso Sapatu, ma taumafai ia ola amiotonu i isi auala uma. E tatau foi ona faatalanoaina i latou e le epikopo po o le peresitene o le paranesi ma le peresitene o le siteki po o le peresitene o le misiona ma ia agavaa e maua se pepa faataga o le malumalu. O lenei lesona o le a toe faamanatu ai nisi o mataupu faavae o le talalelei ma poloaiga e tatau i tagata o le vasega ona ola ai ina ia mafai ai ona auai atu ma le agavaa i le malumalu.

### AMIOGA MAMA

Ia faamalamalama atu faapea ua aoao soo mai le Alii ma Ana Perofeta i le taua tele o le ola mama. Sa aoao mai Peresitene Gordon B. Hinckley: “Matou te talitonu i le legavia ao lei faaipoipo ma le faamaoni atoatoa pe a uma ona faaipoipo. O le aotelega lena. O le ala lena e maua ai le fiafia i le olaga, o le ala lena e faamalieina ai. E aumaia ai le filemu i le loto ma le toafilemu i le aiga” (i le Conference Report, Oke. 1996, 68; po o le *Liahona*, Ian. 1997, 57).

Ia faitau faatasi mau nei:

Mataupu Faavae ma Feagaiga 42:22–24 (Ua poloaiina i tatou e le Alii ina ia alolofa i o tatou taitoalua ma ia aua ne’i saili atu mo se isi lava; ua ia poloaiina i tatou ina ia aua nei mulilua.)

Mataupu Faavae ma Feagaiga 121:45 (Ua poloaiina i tatou e le Alii ina “ia teuteuina o [tatou] manatu i le mama e le aunoa.”)

1 Timoteo 4:12 (E tatau ona avea i tatou ma faataitaiga o le mama atoatoa.)

1 Nifae 10:21 (E le mafai ona nofo se mea eleelea faatasi ma le Atua.)

Mataupu Faavae o le Faatuatua 1:13 (Matou te talitonu ia nofo mama ma amio mama.)

- Aisea ua matua faamamafaina ai e le Alii ia amioga mama?
- O a nisi o taunuuga o amioga le mama ua tatou vaaia i le lalolagi ua siomia ai i tatou? O a nisi o faamanuiaga o le ola ai i se olaga mama?

Ia tatai atu manatu o tagata o le vasega i le upusii na e tusia i le laupapa po o le pepa lautele (tagai i le vaega o “Sauniuniga” i lenei lesona).

- E mafai faapefea ona fesoasoani lenei lapataiga ia te i tatou ma a tatou fanau ina ia tetee atu i faaososoga ma ola i ni olaga mama?

### SEFULUAI

Fai atu i tagata o le vasega e faitau le Mataupu Faavae ma Feagaiga 119:4.

Ia faamalamalama atu faapea ua tuuina mai e le Au Peresitene Sili le faamalamalamaga lenei e uiga i le sefuluai sao: “O le faaupuga faigofie ua matou iloaina o le fetalaiga a le Alii lava ia, ua faapea mai, o tagata o le Ekalesia e tatau ona totogiina le ‘tasi vae-sefulu o a latou tupe faasili i le tausaga atoa,’ o lona uiga o le tupe maua” (tusi a le Au Peresitene Sili, 19 Mat. 1970). O tupe o sefuluai ua faaaogaina e fausia ai falelotu ma malumalu, e lagolagoina ai le galuega faafaifeautalai, ma fausia ai le malo o le Atua i luga o le fogaeleele.

Ia fetufaai atu le saunoaga lenei mai ia Peresitene James E. Faust:

“O le sefuluai o se matupu faavae taua mo le fiafia o le tagata lava ia ma le soifua sololelei o tagata o le Ekalesia i le lalolagi atoa, o e mauoa ma e matitiva. O le sefuluai o se mataupu faavae o le ositaulagaina ma o se ki e tatalaina ai pupuni o le lagi. . . . O tagata o le Ekalesia e le totogiina sefuluai e le faapea e aveesea ai lo latou auai i le ekalesia; ae latou te le maua ai faamanuiaga” (i le Conference Report, Oke. 1998, 73–74; po o le *Liahona*, Ian. 1999, 67–68).

Toe iloilo faatasi ma le vasega mau nei:

Levitiko 27:30 (O le sefuluai e a le Alii ia; e paia i le Alii.)

Malaki 3:8–11 (Tatou te faoa mea a le Atua pe a tatou taofia a tatou sefuluai; o le a faamanuiaina tele e le Atua i latou e totogi a latou sefuluai.)

- O a faamanuiaga ua e maua ona ua e totogiina sefuluai?
- Aisea ua tatou faoa ai mea a le Atua pe a tatou le totogia sefuluai? (Tagai MFF 104:14.)

Faamatala atu o tausaga taitasi e faatonuina ai tagata o le Ekalesia e feiloai ma o latou epikopo po o peresitene o paranesi i le faatalanoaga faaiu o le sefuluai ma tautino atu ai ia te ia pe na latou totogiina se sefuluai atoa. O lenei feiloaiga o se avanoa lea mo tagata o le Ekalesia e iloilo ai pe o le a le tulaga o latou faataunuuna ai lenei poloaiga taua.

### O LE UPU O LE POTO

Ia faamalamalama atu faapea, a o lei mafai ona tatou ulufale atu i le malumalu, ua faamoemoe le Alii ia tatou saoloto mai uiga leaga e masani ona tatou faia lea e le mama ma le maloloina ai o tatou olaga, e le gata i le faaleagaga ae faapea foi i le faaletino.

Faitau ni vasega po o mau uma ia o loo taua i lalo:

1 Korinito 3:16–17 (O o tatou tino o malumalu o le Atua ma e le tatau ona faaleagaina.)

Mataupu Faavae ma Feagaiga 89 (O lenei faaaliga ua lauiloa o le Upu o le Poto. O fuaiupu 1–9 o loo talanoaina ai mea e le tatau ona tatou tuuina i totonu o o tatou tino; o fuaiupu 10–17 o loo talanoaina ai mea e lelei mo o tatou tino; o fuaiupu 18–21 ua faamatalaina ai folafolaga a le Alii ia i latou o e tausia Ana poloaiga.)

- O a ni mea ua i ai i le lalolagi i aso nei e faatosina ai i tatou e solia poloaiga ua tuuina mai ia i tatou i le Upu o le Poto?
- E mafai faapefea ona tatou fesoasoani ia i tatou lava ma a tatou fanau ia tausia tulafono a le Alii mo le soifua maloloina?

Fai atu i tagata o le vasega e faitau le Mataupu Faavae ma Feagaiga 29:34.

- O a ni auala e te manatu e mafai ai e le usiusitai i le Upu o le Poto ona faamanuiaina i tatou faaleagaga faapea foi ma le faaletino?
- O a ni “oa sili o le malamalama” (MFF 89:19) e mafai ona tatou mauaina e ala i le tausia o nei poloaiga?

Ia fetufaai atu le saunoaga lenei mai ia Peresitene Boyd K. Packer:

“O a mea o loo e aoaoina faaleagaga, e faalagolago i le tulaga o loo e tausia ai lou tino. O le ala lea e matua taua tele ai le Upu o le Poto.

“O tu ma mea masani ua faasaina mai i lena faaaliga—lauti, kofe, ava malosi, ma tapaa—e faalavelave i lagona alofa (mu’amu’a) o fesootaiga faaleagaga, e pei lava foi o isi fualaau oona.

“Aua le le amanaiaina le Upu o le Poto, aua e mafai ona e le maua ai le ‘oa sili o le malamalama, e oo lava i oa natia’ ua folafolaina mai mo i latou e tausia. Ma o le soifua maloloina o se tasi lea o faamanuiaga faaopoopo” (i le Conference Report, Oke. 1994, 78; po o le *Liahona*, Ian. 1995, 73).

### **O LE ASO SAPATI**

Faitau faatasi le Esoto 20:8–11.

Ia faamalamalama atu e poloaiina pea lava pea le nuu o le Alii ina ia tausia ma faapaia le Aso Sapati. Ua folafola mai e le Alii faamanuiaga silisili mo i latou e faapea ona faia.

Fai atu i tagata o le vasega e faitau le Mataupu Faavae ma Feagaiga 59:9–13.

- O a ni faapogai autu na tuuina mai e le Alii mo le tausia o le Aso Sapati ia paia?
- O a ni auala e mafai ai e le Mataupu Faavae ma Feagaiga 59:9–13 ona taitaiina lo tatou faamamaluina o le Aso Sapati?
- O a nisi o faamanuiaga ua folafolaina atu ia i latou o e faamamaluina lelei le Sapati?

I le avea ai ma se vaega o lenei talanoaga, ia fetufaai atu mataupu faavae ua taua i lalo sa aoao mai e Elder James E. Faust:

“Aisea ua fetalai mai ai le Atua ia i tatou ia faamamalu le aso Sapati? O pogai ua ou manatu i ai, e tolu ona vaega. O le pogai muamua ua faatatau i le manaomia faaletino o le malolo ma le faafouina . . . .

“O le pogai lona lua, i lou lava taofi, e sili atu le taua. O se mea lea e uiga i le manaomia ona toe faaolaola ma faamalositia o lo tatou tagata faaleagaga . . . .



“O le pogai lona tolu atonu o le pogai pito i taua lea o mea e tolu. O se mea e uiga i le usiusitai i poloaiga ma o se faailoga lea o lo tatou alofa i le Atua. Amuia i latou e le tau manaomia ni mafuaaga ae sei vagana ai lo latou alofa mo le Faaola ina ia tausia ana poloaiga” (i le Conference Report, Oke. 1991, 46–47; po o le *Liahona*, Ian. 1992, 40).

- O a nisi o faamanuiaga ua oo mai i lou olaga ona o lou tausia ma faapaia le aso Sapati?

Ia fai atu i tagata o le vasega ina ia faia ni a latou lava tautinoga e ola i poloaiga ua talanoaina i le aso: amioga mama, sefuluai, o le Upu o le Poto, ma le faamamaluina o le aso Sapati. Ma o le a saunia lelei ai i latou e ulufale atu i le malumalu ma maua ai faamanuiaga silisili mai le Alii.

#### **O LE FAAGASOLOGA E MAUA AI SE PEPA FAATAGA O LE MALUMALU O SE FAAMANUIAGA**

Ia faamalamalama atu, ao lei mafai ona o atu tagata o le Ekalesia i le malumalu, e tatau ona agavaa i latou taitoatasi e mauaina se pepa faataga o le malumalu. E pei ona faamalamalamaina atu i le faamatalaga o loo i lalo, o le faagasologa e maua ai lenei pepa faataga e mafai ona faamanuiaina ai olaga o tagata taitoatasi:

*“Ou te . . . valaau  
atu i tagata uma  
o le Ekalesia ia  
faatuina le  
malumalu o le Alii e  
avea o se faatusa sili  
o lo latou auai i le  
Ekalesia ma se  
faailoga faalelagi  
mo a latou feagaiga  
sili ona paia”  
(Peresitene Howard W.  
Hunter).*

“O le epikopo o loo i ai le matafaioi e suesueina ai lo tatou agavaa. O lenei faatalanoaga e taua tele ia te oe i le avea ai ma se tagata o le Ekalesia, aua o se taimi lea e iloiloaina ai ma se auauna faauuina a le Alii ia le tulaga o loo agai i ai lou olaga. Afai e i ai soo se mea o loo faaletonu i lou olaga, o le a mafai e le epikopo ona fesoasoani ia te oe e faaleleia. O lenei faiga, a o oulua talanoa ma le faamasino o Isaraelu, e mafai ai ona e faailoa atu pe fesoasoani atu ai foi ia te oe ina ia faatulagaina lou agavaa e ulufale atu i le malumalu faatasi ai ma le faamaoniga a le Alii.” (*Saunia e Ulufale Atu i le Malumalu Paia*, 3).

Ia faamalamalama atu faapea e faatalanoa e le epikopo po o le peresitene o le paranesi ma le peresitene o le siteki po o le misiona i latou uma o e sailia se pepa faataga o le malumalu mo le taimi muamua faapea ma i latou ua fuafua e faaipoipo i totonu o le malumalu. E mafai e fesoasoani i le au epikopo ma le au peresitene o le siteki ona faatalanoa i latou o e fia faafou a latou pepa faataga o le malumalu.

O le taimi lea, ia tuu atu i le epikopo po o le peresitene o le paranesi po o se tasi o ona fesoasoani, e tuuina atu le aoaoga e uiga i pepa faataga o le malumalu. E le tatau ona ia faitauina atu ia fesili tonu o le faatalanoaga i se faalapotopotoga, ae e mafai ona ia tuuina atu ni manatu e uiga i mea e mafai e tagata o le vasega ona iloa pe a faatalanoaina i latou mo se pepa faataga o le malumalu. E mafai ona faaaoga faamatalaga o loo i lalo e fai ma taiala:

O tagata o le Ekalesia o loo sailia se pepa faataga o le malumalu, e tatau ona i ai ni a latou molimau i le Tama Faalelagi, ma le Alii o Iesu Keriso, ma le Agaga Paia. E tatau ona latou lagolagoina le perofeta a le Alii, ma isi Au Pulega Aoao, ma o latou taitai o le Ekalesia i o latou alalafaga. E le tatau ona fegalegaleai pe auau faatasi ma vaega po o tagata taitoatasi o e ua toe liliuese ma le Ekalesia, po o a latou aoaoga po o gaoioiga e feteenai ma le talalelei.

O i latou o e sailia ni pepa faataga e tatau ona auai faamaoni i sauniga faamanatuga, sauniga faaleperisitua, ma isi sauniga a le Ekalesia. E tatau ona latou galulue maelega i o latou valaauga e tuuina atu i le pule o le perisitua. E tatau ona latou taumafai e tausia poloaiga uma a le Alii, e aofia ai le totogiina atoa o le sefuluai, faamaoni i upu ma amioga, ma ia le faaaogaina foi le lauti, kofe, ava malosi, tapaa ma isi mea leaga ua avea ma mausa.

E tatau ona latou ola i ni olaga mama ma lelei atoatoa ma e tatau ona usitai i le tulafono a le Alii o le legavia, lea e faasaina ai uiga feusuai ma soo se tasi sei vagana ai o le toalua ua faaipoipo i ai faaletulafono. E tatau ona latou ola e tusa ai ma aoaoga faavae o le talalelei i fegalegaleaiga faaleagaga ma le faaletino ma isi tagata o o latou aiga. E le tatau ona latou auai i soo se faiga faatautala faaleagaga, faaletino, faalemafaufau, po o le faalelagona i isi.

E tatau ona naunau e tautau atu a latou agasala ma lafoaia. O agasala matuia, e pei o le solia o amioga mama, faasaunoa i tagata o le aiga, faifaimea faatasi ma vaega ua liliuese, po o le matuia o le solia o le tulafono faalemalo, e tatau ona tautau atu i le epikopo po o le peresitene o le paranesi i se taimi a o lei taitai ona tuuina atu se pepa faataga o le malumalu. Afai i le mafaufau o le tagata, o le Malamalama lea o Keriso ua tuuina atu i tagata uma, e tulai mai ai se fesili e uiga i se mea pe tatau ona talanoaina ma le epikopo po o le peresitene o le paranesi, e tatau lava ona talanoaina.

O i latou o e ua aafia i se faaipoipoga ua tatalaina e manaomia se faatagaga mai le epikopo po o le peresitene o le paranesi ma le peresitene o le siteki po o le misiona ao lei mauaina se pepa faataga o le malumalu. E tatau lava ona latou mulimulitai i maliliega o le iuga o le tatalaina o le faaipoipoga, e aofia ai le totogiina atu o tupe mo le tausiga o le aiga i taimi ua atofaina.

O tagata o le Ekalesia o loo sailia se pepa faataga o le malumalu e tatau lava ona faatalanoaina e se tasi o le au peresitene o le siteki po o le misiona pe a maea ona faatalanoaina e se tasi o le au epikopo po o le au peresitene o le paranesi. Atonu e manatu nisi pe aisea e manaomia ai ia faatalanoaga. Pe a tatou saili mo se pepa faataga o le malumalu, o le mea moni o loo tatou sailia foi se faatagaga mai le Alii e ulu atu ai i le malumalu. Ua tatou maua le avanoa e molimau atu ai i lo tatou agavaa i luma o molimau e toalua o i laua o ni auauna

faamaonia a le Alii. O se faamanuiaga ia i tatou le folafola atu i luma o auauna a le Alii lo tatou agavaa e ulufale atu i le malumalu paia.

#### FAAIUGA

Ina ia faamamafa atu le taua o le agavaa e ulu atu i le malumalu ma le tauaveina i taimi uma o se pepa faataga o le malumalu o loo aoga i le taimi nei, ia toe iloilo le saunoaga lenei a Peresitene Howard W. Hunter:

“Ou te . . . valaau atu i tagata uma o le Ekalesia ina ia faatuina le malumalu o le Alii e avea o se faatusa sili o lo latou auai i le Ekalesia ma se faailoga faalelagi mo a latou feagaiga sili ona paia. O le faanaunauga sili lena o lou loto, ia mafai e tagata uma o le Ekalesia ona agavaa mo le malumalu. Ou te faamoemoe ina ia mafai e tagata matutua uma ona agavaa—ma tauaveina—se pepa faataga o le malumalu o aoga i le taimi nei, e tusa lava pe mamao le malumalu ua le mafai ai ona faaaogaina loa pe faaaogaina soo lena pepa faataga” (sii mai le Jay M. Todd, “Peresitene Howard W. Hunter,” *Liahona*, Set 1994, 4).

Ia tuuina atu lau molimau i faamanuiaga ua oo mai i lou olaga ao e ola agavaa e auai atu i le malumalu.

Tofi se tasi e faia le tatalo faaiu.



## O GALUEGA I LE MALUMALU E AUMAIA AI FAAMANUIAGA SILI I O TATOU OLAGA

*“Matou te ole atu  
foi ia te oe, Le  
Tama Paia e, ina  
ia o atu au auauna  
mai lenei fale o  
faaaupegaina i  
lou mana, ina ia  
i ai foi lou suafa  
ia te i latou, ma  
siomia i latou i  
lou mamalu, ae  
leoleoina i latou  
e au agelu”  
(MFF 109:22).*

### FAAMOEMOEGA

Ina ia fesoasoani i tagata o le vasega ia malamalama o i latou e auai atu ma le agavaa i le malumalu o le a mauaina faamanuiaga silisili mai le Alii.

### SAUNIUNIGA

1. Ia iloiloaina ma le faaeteete mau o loo faaogaina i lenei lesona ina ia e saunia e taitai talanoaga a le vasega e uiga i ai.
2. Atonu o le a e manao e sauni e usuina e tagata o le vasega le viiga e uiga i galuega faalemalumalu, pe faatatau foi i le uiga e faavavau o le upumoni.
3. Afai e maua le *Ata Vitio Faaopoopo o Afiafi Faaleaiga (5X736)*, atonu e te manao e faaali le vaega “O Malumalu e mo Feagaiga e Faavavau,” o se ata e ono minute le umi.

### TUUINA ATU O LE LESONA

Tofi se tasi e faia le tatalo amata.

Fesili atu i le vasega pe i ai ni fesili. Ia faaalu le taimi e manaomia e tali ai fesili i le mea sili e te mafaia ma e pei ona taitaiina ai e le Agaga o le Alii. Ia manatua o nisi vaega o galuega faalemalumalu e le tatau ona talanoaina i fafo o le malumalu.

### SA I AI LAVA GALUEGA FAALEMALUMALU TALU MAI ANAMUA

Atonu e te manao e amata i le usuina faatasi o se viiga e faatatau i le galuega faalemalumalu pe faatatau foi i le uiga e faavavau o le upumoni.

Ia faamalamalama atu faapea na poloaiina soo e le Alii Ona tagata ina ia fausia malumalu. Sa Ia faaalua mai le galuega e faia i totonu o malumalu.

- O a malumalu po o falefetafai o loo taua mai i totonu o tusitusiga paia?

Fai atu i tagata o le vasega e toe vaavaai i faasino upu o tusitusiga paia e sue mai ai mau e uiga i malumalu ma falefetafai. Atonu e te manao

e lisi tali a tagata o le vasega i luga o le laupapa. Atonu foi e te manao i tagata o le vasega ina ia toe faamanatu ia mau ua taua i lalo:

Falefetafai o Mose: Esoto 40:1–2, 34–38

Malumalu o Solomona: 2 Nofoaiga Tupu 3:1–2; 5:1

Malumalu o Herota: Mataio 21:12–15

Malumalu o Sa Nifae: 2 Nifae 5:16; Mosaea 1:18; 3 Nifae 11:1

Ia faamalamalama atu, talu ai ona o le liliuese, o nei malumalu uma na iu ina galo i tagata o latou faamoemoega moni ma na faaleagaina ai. O le atoatoaga o galuega faalemalumalu ua toefuatai mai i o tatou nei aso e ala mai i le Perofeta o Iosefa Samita, ua aumaia ai faamanuiaga silisili i o tatou olaga.

Na saunua mai Elder Bruce R. McConkie: “O le fauina musuia ma le faaaoga tatau o malumalu, o se tasi lea o faailoga maoae o le paia o le galuega a le Alii. . . . O le mea e i ai malumalu, ma le agaga o faaaliga e i luga o i latou o e galulue i totonu o na malumalu, o iina e maua ai tagata o le Alii; o nofoaga e le i ai nei mea, e le i ai le Ekalesia ma le malo ma upumoni o le lagi” (*Mormon Doctrine*, 2nd ed. [1966], 781).

#### **O I LATOU E AUAI ATU I LE MALUMALU MA LE AGAVAA UA FOLAFOLAINA I AI FAAMANUIAGA SILISILI**

O le malumalu, po o le maota o le Alii, o le nofoaga lea tatou te o i ai e saunia ai mo le faaeaina i le malo selesitila. O iina tatou te aoao atili ai e uiga i le Tama Faalelagi ma Iesu Keriso. Tatou te osia ai feagaiga ma i Laua, ma La te folafolaina mai ai foi faamanuiaga matagofie ia i tatou.

I le Mataupu Faavae ma Feagaiga, o loo faamatala mai ai e le Alii nisi o faamanuiaga e maua e i latou e auai atu i le malumalu ma ola agavaa i feagaiga e osia iina. O nisi o nei faamanuiaga o loo faamatalaina i le vaega e 109, o le tatalo lea na faia i le faapaiaga o le Malumalu i Katelani. O upu o lenei tatalo sa tuuina atu ia Iosefa Samita i se faaaliga.

Na saunua mai Peresitene Howard W. Hunter o lenei tatalo “ua faaaauu pea ona tali mai i o tatou luga taitoatasi, ma o tatou luga i le aveai ai ma ni aiga, ma o tatou luga i le aveai ma nuu ona o le mana o le perisitua ua tuuina mai e le Alii ia i tatou e faaaoga i Ona malumalu paia” (“O le Faailoga Maoae o lo Tatou Auai i le Ekalesia,” *Liahona*, Nov. 1994, 4).

Ona sii mai lea e Peresitene Hunter ia nisi o fuaiupu mai le vaega e 109. Fai atu i tagata o le vasega e faitau fuaiupu nei: Mataupu Faavae ma Feagaiga 109:10–12, 22–23, 59, 67, 72, 75. Fai atu ia i latou e vaavaai mo faamanuiaga o loo taua mai e le Alii.

A maea ona faitau, fai atu i tagata o le vasega e lisi ia faamanuiaga na latou mauaina. Tusi ia manatu i luga o le laupapa. Atonu e aofia ai faamanuiaga o loo ta'ua i faamanuiaga nei:

1. O le a i ai le mamalu o le Alii i luga o Lona nuu.
2. O le a tuua e auauna a le Alii le malumalu ma le mana o le Alii, o lona suafa, ma lona mamalu, ma o le a leoleoina i latou e agelu.
3. O le a aveina atu e auauna a le Alii upumoni o le talalelei mai le malumalu i tuluiga o le lalolagi.
4. O le a faatulagaina siteki ina ia faapotopoto ai le nuu o le Alii.
5. O le a aoaoina e tagata uma ua faataapeapeina o Isaraelu le upumoni ma olioli ai.
6. O le a manatuaina i luma o le Alii aiga o le Au Paia ma o latou tagata mamai ma puapuagatia.
7. O le a faatumuina le lalolagi i le malo o le Alii.
8. O le a i ai se aso e o ae ai auauna a le Alii e faafetaiai ia te Ia ma faatasi ma Ia e faavavau.

*“Ioe, ou te i ai foi iina, aua ou te oo atu i ai, o e loto mama uma foi o e oo mai i ai o le a vaaia le Atua” (MFF 97:16).*

- O le a sau faalogona pe a e manatunatu i nei faamanuiaga matagofie ua folafolaina atu ia i latou o e auai atu ma le agavaa i le malumalu ma faamamalu i a latou feagaiga?

Na saunoa mai Peresitene Howard W. Hunter: “Pe na i ai ea se nuu ua i ai ni folafolaga faagaetia ma matagofie faapena! E leitioa a naunau le Alii ina ia taitai atu e Ona soo i latou lava i Ana faataitaiga ma agai atu i Ona malumalu” (*Liahona*, Nov. 1994, 5–6).

Na faia foi e le Alii ni folafolaga e faataata i malumalu i le Mataupu Faavae ma Feagaiga 97. Fai atu i tagata o le vasega e faitau le Mataupu Faavae ma Feagaiga 97:15–21.

- O a ni aoaoga o loo aoao mai e fuaiupu e 15–17 e uiga i mea e tatau ona faia e le nuu o le Alii ina ia agavaa ai mo faamanuiaga a le Alii i Ona malumalu? (Ia mama o latou loto ma ia le faatagaina lava se mea eleelea i totonu o ona malumalu.)

Ia faamalamalama atu faapea o i latou o e loto mama e taua o Siona. O fuaiupu e 15–21 o loo aoao mai ai faapea e mafai ona tatou fesoasoani e fausia Siona e ala i le auai atu ma le agavaa i le malumalu ma taumafai ina ia mama atoatoa o tatou loto ma ia le faaleagaina lava e le tiapolo.

- O a ni faamanuiaga ua folafola mai i nei fuaiupu i ni tagata ua agavaa e taua ai o Siona?

Ia faamalamalama atu faapea sa i ai se aai e igoa o Siona i aso anamua. O lenei aai na fausia e le perofeta o Enoka ma lona nuu. Na aveina a'e i le lagi ona o le amiotonu o ona tagata (tagai i le MFF 38:4; Mose 7:18–21, 69).

O le a i ai foi Siona i aso e gata ai. I le mataupu faavae e sefulu o le faatuatua, o loo folafola mai ai e le Alii o le a fausia se aai e igoa ia Siona i le konitineta o Amerika. Fai atu i le vasega e faitau lenei mataupu faavae o le faatuatua. Ia faamatala atu o tagata Isaraelu ua faataapepeina o le a faapotopoto i lenei aai tele (tagai i le MFF 103:11–13).

O aso nei, ua fautuaina tagata o le Ekalesia ina ia agavaa e auai atu i le malumalu paia ma ia fausia Siona i soo se mea o loo nonofo ai i le lalolagi. E tatau ona tatou faatulagaina o tatou aiga e pei o malumalu—o ni nofoaga o le mama, alofa, ma faaaliga mo le tagata lava ia.

- O a ni mea e mafai ona tatou faia ina ia atili mama ai o tatou loto?
- O a ni auala e faafaigata ai e le lalolagi i nisi taimi ona faatumauiina le loto mama?
- O a ni auala e mafai ona e fesoasoani ai i lou aiga, paranesi, po o le uarota ina ia avea ma e loto mama?

Ia faamalamalama atu faapea o i latou ua osia ma tausia feagaiga i le malumalu ma taumafai i o latou olaga atoa ina ia loto mama, o i latou na e mafai ona fesoasoani i le fausiaina o Siona.

#### FAAIUGA

Ia molimau atu o i latou o e auai atu ma le agavaa i le malumalu o le a latou mauaina faamanuiaga silisili mai le Alii, e aofia ai faamanuiaga o le avea ma nuu o Siona. E tatau ona tatou faia mea uma e mafai ona tatou faia ina ia tatou agavaa ai mo nei faamanuiaga, ma avea ma e loto mama.

Atonu e te manao e faaali le ata vitio “O Malumalu e mo Feagaiga e Faavavau.”

Tofi se tasi e faia le tatalo faaiu.



## O LE MAUAINA O SAUNIGA MA FEAGAIGA O LE MALUMALU

*“A aunoa ma ia  
sauniga, ma le  
pule o le perisitua,  
e le faaalua mai le  
mana o le amioatua  
i tagata i le tino”  
(MFF 84:21).*

### FAAMOEMOEGA

Ina ia fesoasoani i tagata o le vasega ia malamalama i le taua o sauniga ma feagaiga o le malumalu.

### SAUNIUNIGA

1. Afai e maua i lo outou eria, atonu e te manao e faaali le ata vitio *Introductory Gospel Mesages* (5X196). O le umi o le aoaoga pe tusa ma le 27 minute.
2. Atonu e te manao e sauni tagata o le vasega e usuina le “Faapaia Mai A’u” (*Viiga*, i. 70).

### TUUINA ATU O LE LESONA

Tofi se tasi e faia le tatalo amata.

Fesili atu i le vasega pe i ai ni fesili. Ia faaalu le taimi e manaomia e tali ai fesili i le mea sili e te mafaia ma e pei ona taitaiina ai e le Agaga o le Alii. Ia manatua o nisi vaega o galuega faalemalumalu e le tatau ona talanoaina i fafo o le malumalu.

### O TOTONU O MALUMALU TATOU TE MAUA AI SAUNIGA MA OSIA AI FEAGAIGA

Ia faamalamalama atu faapea o totonu o malumalu tatou te maua ai sauniga lea o le a mafai ai ona tatou toe foi atu i le afioaga o le Atua. Tatou te osia foi feagaiga e ola i tulafono o le talalelei. O mea o loo taua i lalo o le a maua ai faamatalaga e uiga i sauniga ma feagaiga i lona tulaga lautele, ae patino lava i sauniga ma feagaiga o le malumalu.

### *Sauniga*

Ia faamalamalama atu faapea o se sauniga o se faagasologa paia lea e i ai sona uiga ma se aafiaga faaleagaga.

Ia fai atu i tagata o le vasega e tau mai nisi o sauniga o le Ekalesia. (Atonu latou te tauina mai le faaigoaina ma le faamanuiaina o pepe, papatisoga, faamauga, faamanatuga, faauuina i le perisitua, ma sauniga o le malumalu.)



Ia faamalamalama atu faapea o sauniga e faataunuuina i le mana o le perisitua e taua mo lo tatou faaeaga. Tatou te mauaina le mana o le Atua i o tatou olaga e ala i nei sauniga.

Fai atu i tagata o le vasega e faitau le Mataupu Faavae ma Feagaiga 84:19–21.

- O le a le mea e manaomia ina ia mafai ona faaali mai ai le mana o le amioatua ia i tatou? (O sauniga o le Perisitua Mekisateko. O le “perisitua maualuga” o loo tauina mai i nei fuaiupu o le Perisitua Mekisateko lea.)

Fai atu i tagata o le vasega e sue i le itulau e 29 o le *Saunia e Ulufale Atu i le Malumalu Paia*. Fai atu i se tagata o le vasega e faitau leotele mai le saunoaga o loo taua i lalo:

*“Ua tatou osia ni feagaiga e tuuina atu lo tatou taimi ma a tatou tupe ma taleni—o mea uma ua tatou maua—i le atiinae o le malo o le Atua i le lalolagi”*  
(*Saunia e Ulufale Atu i Malumalu Paia*, 35).

“O le a se taua o ia sauniga ia i tatou i le avea ai ma tagata o le Ekalesia?”

“Pe mafai ona e maua le fiafia, pe mafai ona faaolaina oe, pe mafai ona faaeaina oe e aunoa ma nei sauniga? Tali: Ua matuai fautuaina lava ina ia tatou mauaina ma e matuai manaomia lava ma sili atu foi le moomia. E sili atu ona taua. E matuai *taua* lava mo i tatou uma taitoatasi.”

### ***Feagaiga***

Ia faamamafa atu faapea o le feagaiga o se maliliega paia lea i le va o le Atua ma se tagata po o se vaega o tagata. Ua faataatitia e le Atua ni aiaiga patino, ma ua Ia folafola mai o le a faamanuiaina i tatou pe a tatou usitaia na tulaga. Afai tatou te filifili e le tausia ia feagaiga, o le a le mafai foi ona tatou mauaina ia faamanuiaga, ma o nisi tulaga tatou te mafatia ai i se faasalaga ona o se taunuuga o lo tatou le usiusitai. O sauniga faaola o le perisitua e masani lava ona o mai faatasi ma feagaiga.

- O a ni feagaiga ua outou osia ma le Alii i lenei vaega o o outou olaga? (E mafai ona tau mai e tagata o le vasega ia feagaiga o le papatisoga, lea e faafouina i taimi uma lava tatou te taumamafa ai i le faamanatuga.)

- O a feagaiga tatou te osia pe a papatisoina i tatou? (Tagai i le Mosaea 18:8–10; MFF 20:37.)

Ia faamamafa atu e faapea afai tatou te osifeagaiga ma le Atua, ua tatou faailoa atu lo tatou mananao e auauna atu i le Atua ma lo tatou naunautai e usitaia mea uma ua talosagaina ai i tatou. O le tau, ua folafola mai e le Atua ia i tatou le anoanoai o faamanuiaga matagofie. E ao ona tatou osia ma tausia feagaiga ina ia tatou agaigai atu ai i luma i le ola e faavavau.

***Sauniga ma Feagaiga o le Malumalu***

Ia faamalamalama atu o sauniga o le malumalu e aofia ai le faaeega paia ma faamauga (faaipoipoga faalemalumalu ma le faamauina o matua i fanau) mo e o soifua ma e ua maliliu. O le sauniga o le papatisoga mo e ua maliliu e faataunuaina i totonu o malumalu, e pei foi o isi sauniga o le perisitua. I sauniga o le malumalu, tatou te osia ai feagaiga paia e tuuina atu ai i tatou lava i le Atua ma fesoasoani e fausia Lona malo i luga o le fogaeleele.

Na saunoa mai Elder James E. Talmage e uiga i feagaiga tatou te osia i le faaeega paia:

“O sauniga o le faaeega paia ua aofia ai ni tiute faapitoa e faia e le tagata, e pei o le feagaiga ma le folafolaga e tausia le tulafono o le amio mama aiai ma le legavia, ia agaalofa, agalelei, faapalepale ma loto mama; ia tuuina atu taleni ma mea uma i le faasalalauina o le upumoni ma le siitia i luga o tagata; ia faatumauina le naunautai i le galuega o le upumoni; ma ia saili i soo se auala e fesoasoani atu ai i le sauniuniga sili ina ia mafai ona saunia le lalolagi e talia lona Tupu,— le Alii o Iesu Keriso. O le osia o feagaiga taitasi ma le faia o tiute taitasi, ua aumaia faatasi ma se folafolaga, e tuuina atu i luga o e tausia ma le faamaoni na tulaga” (*The House of the Lord*, rev. ed. [1976], 84).

Atonu e te manao e toe iloilo feagaiga na faatoa faamatalaina atu i le tusia lea i luga o le laupapa. Ia faamamafa atu faapea, tatou te osia feagaiga ina ia amiotonu ma mama atoatoa, ma e tatou te osia foi feagaiga e tuuina atu a tatou mea uma e fausia ai le malo o le Alii. Faitau atu le faamatalaga o loo taua i lalo:

“O i tatou o tagata o le feagaiga. Sa tatou osia ni feagaiga e tuuina atu o tatou taimi ma a tatou tupe ma taleni—o mea uma ua tatou maua— i le atiinaae o le malo o le Atua i le lalolagi” (*Saunia e Ulufale Atu i le Malumalu Paia*, 35).

- O a ni auala e mafai ai ona tatou tuuina atu “mea uma ua tatou maua” mo le malo o le Atua?
- O a ni mea e taofiofia ai tagata i nisi taimi mai le tuuina atu o mea uma latou te maua i le malo o le Alii?

Atonu e te manao e fetufaai atu lau molimau e uiga i faamanuiaga ua oo mai i lou olaga ona ua e osia ma tausia feagaiga i le malumalu. Pe atonu e te manao foi e fai atu i se isi tagata ua faia ona faaeega paia e faamatala mai lana molimau.

**E TATAU ONA TATOU FAAMAONI I FEAGAIGA UA TATOU OSIA I TOTONU O LE MALUMALU**

Ia faamalamalama atu faapea, ua fetalai mai le Alii, “O ia foi ua tuuina atu i ai o mea e tele, latou te fai atu ia te ia e au mai mea e sili ona tele” (Luka 12:48).

- O le a so outou manatu e faapefea ona faatatau lenei fuaiupu i feagaiga ua tatou osia i le malumalu?

Ia faamalamalama atu ua tuuina mai e le Alii nei sauniga ma feagaiga o le malumalu ina ia mafai ai ona malamalama lana fanau i le faamoemoega o le olaga ma ia saunia ai mo avanoa mamalu o le ola e faavavau. A tatou mauaina nei faamanuiaga, o le a i o tatou luga le matafaioi o le ola agavaa e tusa ma lo tatou malamalama ma avanoa ua faateleina. Ia faamamafa atu e tatau ona tatou faamaoni i feagaiga ua osia i totonu o le malumalu.

- Aisea e matuai taua ai le faamaoni i feagaiga ua tatou osia i totonu o le malumalu?

Fai atu i le vasega e faitau le Mataupu Faavae ma Feagaiga 82:10.

*“Ua noatia au le Alii, pe a outou faia mea ou te fai atu ai; ae pe a outou le faia mea ou te fai atu ai, e leai sa outou folafolaga” (MFF 82:10).*

Na saunoa mai Peresitene Iosefa Filitia Samita e faapea: “Ou te fai atu ia te outou e le noatia le Alii, sei vagana ua outou tausia le feagaiga. E le solia lava e le Alii lana feagaiga. Afai na te osia se feagaiga ma se tasi o i tatou, o le a na le solia lava. Ae afai o le a solia, o i tatou lava e soliaina. Ae afai foi o le a solia, e le o i a te ia se matafaioi e tuuina mai ai ia i tatou le faamanuiaga, ma o le a tatou le mauaina lava” (*Doctrines of Salvation*, tuufaatasia e Bruce R. McConkie, 3 voluma [1954–56], 2:256–57).

#### **O LE FAAMAONI I A TATOU FEAGAIGA O LE A AUMAIA AI LE FILEMU MA LE SAOGALEMU**

Ia faamalamalama atu faapea o le malumalu o se nofoaga o le filemu ma o se maluapapa i se lalolagi faigata. A o tatou auai atu e le aunoa i le malumalu ma faamaoni i a tatou feagaiga, o le a tatou maua le filemu, saogalemu, ma le taitaiga i o tatou olaga.

Ua saunoa mai Elder Neal A. Maxwell, “Afai tatou te tausia a tatou feagaiga, o le a faasaogalemuina foi i tatou faaleagaga” (i le Conference Report, Ape. 1987, 87; po o le *Liahona*, Iul 1987, 70).

- O a ni auala ua fesoasoani ai feagaiga ua e osia e faasaogalemuina ai oe faaleagaga?

Ia faamanino atu faapea o totonu o le malumalu tatou te osifeagaiga ai ina ia ola agavaa e toe foi atu i le afioaga o le Tama Faalelagi ma Iesu Keriso. O nisi taimi, i le lotolotoi o o tatou tauiviga i aso taitasi, tatou te taumanatunatu ai pe ua tataua ea lea ituaiga olaga.

Fai atu i le vasega e faitau le 1 Nifae 17:3, 13.

- O a ni mea o loo aoao mai e nei mau e uiga i le ala o le a fesoasoani mai ai le Alii ao tatou taumafai e toe foi atu ia te Ia? O faapefea ona e vaai le faataunuaina o nei mau i lou olaga?

Na saunoa mai Elder Boyd K. Packer: “A e sau i le malumalu ma maua ou faaeega paia, ma tootuli i le fata faitaulaga ma faamauina ai, e mafai ona e ola i se olaga e masani ai ma avea ma se agaga e masani ai—e tauivi ma tofotofoga, e toilalo ma salamo, ma toe toilalo foi ma salamo, ae ia taumafai pea lava pea e tausia au feagaiga. . . . Ona oo mai ai lea o le aso o le a e maua ai le faamanuiaga: ‘Ua lelei ia, le auauna lelei e, ma le faamaoni, ua e faamaoni i nai mea itiiti, ou te tofia oe e pule i mea e tele; ina ulufale mai ia i le fiafia o lou alii (Mataio 25:21)” (*Let Not Your Heart Be Troubled* [1991], 257).

Ua valaaulia i tatou e Peresitene Howard W. Hunter tatou te o atu soo i le malumalu “mo faamanuiaga patino o le tapuai i le malumalu, mo le paia ma le saogalemu lea e maua i totonu o na puipui mamalu ma le paia. O le malumalu o se nofoaga o le matagofie, o se nofoaga o faaaliga, o se nofoaga o le filemu. O le maota o le Alii. E paia i le Alii. E tatau ona paia ia i tatou” (sii mai i le Jay M. Todd, “Peresitene Howard W. Hunter,” *Liahona*, Nov. 1994, 6).

#### FAAIUGA

Fai atu i tagata o le vasega e fetufaai mai o latou lagona e uiga i faamanuiaga o le mauaina o sauniga o le malumalu ma le osia o feagaiga ma le Tama Faalelagi.

Afai e lava le taimi ma afai e maua i lo outou eria le ata vitio *Together Forever*, atonu e te manao e faali atu lea ata.

Atonu e te manao e usuina e le vasega le “Faapaia Mai A’u.” Molimau atu e uiga i faamanuiaga o le mauaina o sauniga o le malumalu ma le faamanuiaga o le osia o feagaiga ma le Tama Faalelagi.

Tofi se tasi e faia le tatalo faaiu.



## AOAO MAI I LE ALII E ALA I FAATUSA

*“Ou te tuuina atu i le fanauga a tagata le upu ma le upu, o le fuaiupu ma le fuaiupu, o sina mea itiiti iinei ma sina mea itiiti iina; amuia foi i latou o e faalogo i au upu, ma uai mai o latou taliga i lau faatonuga” (2 Nifae 28:30).*

### FAAMOEMOEGA

Ina ia fesoasoani i tagata o le vasega ia malamalama ma latou talisapaia le faaaogaina o faatusa i le malumalu.

### SAUNIUNIGA

1. Aumai se fu’a a lo outou atunuu po o se ata o le tou fu’a.
2. Fai atu i se tasi o le vasega na te otooto mai le tala i le ala na tali atu ai se tasi o le Usoga i se fesili e uiga i ofusa o le malumalu. O loo maua le tala i itulau 20–21 ma le 23 o le *Saunia e Ulufale Atu i le Malumalu Paia*.

Faamatalaga mo le faiaoga: O sauniga ma feagaiga o le malumalu e paia, ma o talanoaga e faatatau i ai e matuai faatapulaaina lava na o totonu o le malumalu. O le mea lea e tatau ai ona faatapulaa talanoaga a le vasega i faamatalaga o loo tuuina atu i le tusi lesona.

### TUUINA ATU O LE LESONA

Tofi se tasi e faia le tatalo amata.

Fesili atu i le vasega pe i ai ni fesili. Ia faaalu le taimi e manaomia e tali ai fesili i le mea sili e te mafaia ma e pei ona taitaiina ai e le Agaga o le Alii. Ia manatua o nisi vaega o galuega faalemalumalu e le tatau ona talanoaina i fafo o le malumalu.

### E TAUA FAATUSA [PO O FAAILOGA O SE MEA TAUA] I O TATOU OLAGA I ASO TAITASI

Ia faamalamalama atu faapea o faatusa e faaaogaina pea lava pea i o tatou olaga i aso taitasi. Ia tusi faatusa nei po o nisi foi faatusa i luga o le laupapa. Fai atu i le vasega e faamatala mai le uiga o faatusa taitasi.



Faali atu i le vasega le fu’a a lo outou atunuu po o se ata foi o le fu’a ma fai i ai e faamatala mai po o le a le uiga o le fu’a ia i latou.

- O a nisi mea po o ni taga e faaalua ai le lotonuu? (o se pese, o se togiga, o se fasi ie, o se aso malolo, po o aso faamanatu.)

Ia faamanino atu faapea o nei mea o ni faatusa ia e faaoga e faailoa ai pe faatusa i ai le lotonuu.

- O a ni faatusa mo le alofa ma le faaaloalo? (O se meaalofo po o se mama, o se sogi po o le fusi mai, o se ata o se fatu.)
- Pe tutusa le savali e tuuina atu e faatusa i tagata uma? Aisea e tutusa ai pe aisea foi e le tutusa ai?
- Aisea tatou te faaogaina ai faatusa?

Tuu atu i le vasega e talanoaina. Atonu o le a latou tuuina mai ni manatu e pei o nei:

1. E fesoasoani faatusa tatou te manatuaina ai ni mea taua.
2. E mafai e faatusa ona aoao mai ia i tatou manatu moni atonu e faigata ona aoaoina i nisi auala.
3. E mafai e faatusa ona faamatalaina lagona.
4. E mafai e faatusa ona aoao mai mataupu faavae eseese e tusa ai ma le maualuga o o tatou tulaga e aoao ai.

Ia faamalamalama atu faapea a faifai soo faatusa, o le a sili atu foi ona tatou malamalama i ai.

#### **SA FAAAOGAINA E IESU KERISO MA ANA PEROFETA IA FAATUSA**

Ia faamalamalama atu faapea sa faaoga soo e le Faaola ia faatusa pe a Ia aoao atu.

- O a nisi o taimi na aoao atu ai le Alii e ala i lona faaogaina o faatusa?

Atonu o le a tau mai e tagata o le vasega ia vaega e pei o le mamoe na se (tagai Mataio 18:12–14); o le fua o le sinapi (tagai Mataio 13:31–32); po o se penina tautele (tagai Mataio 13:45–46).

- O le a sou manatu aisea na faaoga ai e le Faaola ia faatusa pe a Ia aoao atu?

Tuu atu i le vasega e talanoaina. Ona toe faamanatu lea o le faamatalaga o loo i lalo:

“Sa aoao atu foi e le Alii, le Aoao Silisili, Ana aoaoga i Ona soo i tala faa-faataoto na Ia faatusa i ai mea atonu e faigata ona malamalama i ai i se isi lava auala. Sa Ia faaoga mea na silafia ma malamalama i ai Ona soo, ma sa Ia faamatala atu e uiga i matuamoa ma tamaimoa, o manufelelei, o fugalaau, alope, laau, tagata faomea, le goto ifo o le Ia,

tagata mauoa ma e matitiva. . . . Sa Ia fetalai foi e uiga i le fua o le sinapi, ma le penina. Sa Ia finagalo e aoao atu ia i latou o e na fia faalogo mai ia te ia ina ia latou malamalama, ma o lena na Ia faaoga ai mea faigofie na latou malamalama i ai, e avea ma faatusa. E leai se tasi o mea na Ia faatusa i ai Ana aoaoga sa le malamalama i ai i latou na faalogo atu ia te Ia; o mea uma sa Ia faaoga, sa na o ni faatusa.” (Saunia e Ulufale Atu i le Malumalu Paia, 8).

Ia faamalamalama atu e masani foi ona faaoga e perofeta ma aposetolo ia faatusa e aoao atu ai e uiga ia Iesu Keriso ma Lana taulaga togiola. O le Togiola a Iesu Keriso o le faavae lea o le talalelei ma faamanuiga uma ua tatou maua. Na mafua ai ona maua le faaolataga. O le mea lea, o le tele lava o faatusa i tusitusiga paia o loo aoao mai ai i tatou e uiga i le Faaola ma Lana taulaga.

Fai atu i le vasega e faitau le Mose 6:63.

- O a mea o loo i le lalolagi o loo i ai faamaumauga e uiga i le Faaola?

Fai atu i le vasega e faitau le Alema 13:16.

- O a ni mea o loo molimau ai sauniga o le perisitua i le Faaola?

Ia faailoa atu e faapea, ao lei faataunuaina e le Faaola le Togiola, na taulagaina e Ona tagata o le feagaiga ia manu e avea o se faatusa o Lana taulaga togiola (tagai Mose 5:4–8). O lena faiga na faamutaina i le maliu ma le Toetu o le Faaola. O le aso, ua poloaiina i tatou e le Alii ina “ia outou fai ma taulaga ia te [Ia] le loto momomo ma le agaga salamo” (3 Nifae 9:20). Ma o sauniga o le perisitua e faaauau ai pea ona fesoasoani ia i tatou e manatua ai le taulaga togiola a le Faaola. Na aoao mai Elder Russell M. Nelson:

“O sauniga taua o le talalelei ua faatusa i le Togiola. O le papatisoga i le faatofuina o le faatusa o le oti, tanumia, ma le Toetu o le Faaola. O le aai i le faamanatuga e faafouina ai feagaiga o le papatisoga ma e faafouina ai foi o tatou mafaufau i le tino o le Faaola na faalavaau ma Lona toto na faamaligiina mo i tatou. O sauniga o le malumalu e faatusa i lo tatou toe faalelei ma le Alii ma faamauina ai o tatou aiga e faavavau” (i le Conference Report, Oke. 1996, 47; po o le *Liahona*, Ian. 1997, 40).

#### **O FAATUSA E AOAONA AI I TATOU I LE UPUMONI PE AFAI TATOU TE MATAALA FAALEAGAGA**

Ia faamalamalama atu faapea a o i ai le Faaola i le lalolagi, sa fesiligia o Ia e ona soo pe aisea Na te aoao atu ai i faataoto. O faataoto o tala ia e aoao atu ai upumoni taua e masani ona faaogaina ai le gagana faatusa. Ia faitau e le vasega le Mataio 13:10–12 ina ia latou iloa ai le tali a le Faaola.

- O le a so outou manatu o le a le uiga o lenei fetalaiiga a le Faaola?

Ia faamalamalama atu e faaali atu e le Alii le upumoni ia i latou ua saunia faaleagaga ina ia malamalama i ai. O i latou e mauaina upumoni faatasi ma le faatuatua ma le usiusitai, e faaauau pea ona maua le tele o upumoni. O i latou e le o saunia faaleagaga ma le mafai ona latou mauaina le upumoni pe latou te mauaina foi ma se loto masalosalo, o le a faasolosolo malie ona mou atu upumoni ua ia i latou.

O tala e i ai faatusa e aumaia ai upumoni i se auala e malamalama ai i latou ua saunia faaleagaga i uiga o faatusa. O i latou e le o saunia, e le malamalama i le uiga.

O nisi tagata i le vaitaimi o le Faaola na malamalama i savali o Ana faataoto, ae peitai e toatele i latou e lei malamalama. E faapena foi ona moni i aso nei. E tele ituaiga o malamalamaaga faaleagaga i tagata amiotonu o le Ekalesia.

Fai atu i tagata o le vasega e faitau le 2 Nifae 28:30 ma le Mataupu Faavae ma Feagaiga 42:49–50.

- O a mea o loo aoao mai e nei mau e uiga i le auala tatou te aoaoina mai ai upumoni mai le Atua?

Ia faamalamalama atu e mafai e i tatou uma lava ona atiinaae faaleagaga i se tulaga e mafai ai ona tatou malamalama i le uiga o faatusa o loo faaoga i le talalelei, i tusitusiga paia, aemaise lava i totonu o le malumalu.

### **E MAUA MAI I TOTONU O LE MALUMALU AOAOGA FAFAATUSA E SILI ONA PAIA**

*“E i ai le faatusa o mea uma, ma ua foafoaina ma faia mea uma ia latou molimauina au, o mea i la le tino, atoa ma mea i la le agaga” (Mose 6:63).*

Ia faamalamalama atu faapea o aoaoga faa-faatusa sili ona paia i le lalolagi e maua lea i totonu o le malumalu. I se auala faa-faatusa, o aoaoga ma sauniga o le malumalu e aveatu ai i tatou i se faigamalaga e agai atu i le ola e faavavau, ma faaiu atu ai i se faitotoa faa-faatusa e ulufale atu ai i le afioaga o le Atua. O tagata o loo faaalua mai ai, o le faatulagaga faaletino, o laei e ofuina, o faailoga e tuuina mai, ma mea uma lava e faatinoina i le malumalu, o ni faatusa. Afai e malamalama i ai, o le a fesoasoani ia mea i tagata taitoatasi latou te iloa ai le upumoni ma tuputupu ae ai faaleagaga.

O nisi o nei faatusa e tuusao mai lava, ma e ilogofie le uiga. O le malumalu lava ia o se faatusa:

*“Afai ua e silasila i se tasi o malumalu i le po pe a faamumu uma ona moli, e te silafia foi lona matagofie tele. E te tagai atu e susulu atoa le maota o le Alii i le malamalama, ma tu matilatila ese ai lava mai le pogisa, ma faapea ona avea ai ma faatusa o le mana ma le malamalama o le talalelei a Iesu Keriso o se sulu i le lalolagi ua fai ifo lava i le pouliuli faaleagaga” (Saunia e Ulufale Atu i le Malumalu Paia, 10).*



O laei o le malumalu e faatusa foi. A tatou ulu atu i le malumalu, tatou te sui mai o tatou laei masani i laei papae o le malumalu. Na saunoa mai Peresitene James E. Faust:

“E taua i le tapuaiga i le malumalu le mataupu faavae e faapea ‘e le faailogaina tagata e le Atua.’ [Galuega 10:34.] I totonu o puipui paia o malumalu e le faailogaina ai ni tofiga, oa, tulaga, ituaiga, po o aoaoga. E laei papae tagata uma. E tutusa faatonuga e maua e tagata uma, e tutusa feagaiga ma folafolaga e osia e tagata uma, e maua e tagata uma faamanuiaga silisili ma le faavavau pe afai latou te ola agavaa e mauaina. E tutusa tagata uma i Le na faia i latou” (i le Conference Report, Ape. 1997, 23; po o le *Liahona*, Iul 1997, 22).

Ia faamalamalama atu faapea o tagata o le Ekalesia ua maua sauniga o le malumalu ma osia feagaiga ma le Atua latou te ofuina ni ofu faapitoa (ofu i totonu) i o latou olaga atoa. O nei ofu o ni faatusa. Ia faitau atu le faamatalaga o loo taua i lalo:

“O le ofusa o se faatusa lea o feagaiga paia. E uunaia ai le ufiufiina lelei o le tino ma avea o se talita ma puipuiga i le tagata e ofuina. . . . O le ofusa, ua ufiufi ai le tino, o se mea faitino ma vaaia lea e faamanatu ai [feagaiga na osia i totonu o le malumalu]. Ua avea ma talipupuni mo le toatele o le Ekalesia pe afai e feagai le tagata o loo ofuina ma ni faaosoosoga. O se faatusa o lo matou ava i tulafono a le Atua—e aofia ai ma faatulagaga o le ola mama” (*Saunia e Ulufale Atu i le Malumalu Paia*, 20, 23).

Fai atu i le tagata o le vasega na tofi e ootoo mai pe na faapefea ona faamatala e se tasi o le Usoga le faamoemoega o le ofusa o le malumalu (tagai i le *Saunia e Ulufale Atu i le Malumalu Paia*, 20–21, 23).

Ia faamalamalama atu e toetoe o vaega uma lava o le sauniga i le malumalu o faatusa. O lona uiga e tatau i tagata taitoatasi ona saunia ia mataala faaleagaga i uiga o faatusa o faaeega paia i le malumalu.

• O a ni mea e mafai ai ona taofia se tagata mai le mataala faaleagaga i le malumalu?

Atonu o le a tau mai e le vasega ni mea e pei ona taua i lalo:

1. E mafai ona le agavaa se tagata. O se tagata ua le mafai ona salamo faamaoni ma e lei saunia ma le lotomauualalo ma le agaga tatalo mo le malumalu, o le a leai se uiga o faatusa ma o le a natia foi o latou uiga.
2. E mafai ona le lava le faatuatua o se tagata. O se tagata e leai sona faatuatua ia Iesu Keriso ma sauniga o le malumalu e le mafai ona maua ni musumusuga tatau mai le Agaga Paia e malamalama ai i le faaeega paia o le malumalu.

3. Atonu e taulai atu se tagata i le vaaiga i fafo o sauniga lea o le a ia misia ai le mamana o aoaoga o loo tuuina mai e faatusa.

- E mafai faapefea ona tatou saunia ina ia mataala faaleagaga i totonu o le malumalu?

#### FAAIUGA

Ia faamanino atu faapea o i latou e o atu i le malumalu mo le taimi muamua e mafai ona faamoemoe e aoaoina ni mea fou se tele ma lagonaina le mana o le Agaga o le Alii. Ia uunai tagata o le vasega ina ia saunia i latou lava faaleagaga mo o latou aafiaga i le malumalu. Ia faamanatu atu ia i latou e faapea, o mea uma o le a tuuina mai o le a le mafai ona malamalama i ai i se asiasiga se tasi. E tatau ona latou toe malaga soo atu i le malumalu i soo se taimi e mafai ai, ina ia mafai ai ona faaauau lo latou aoao pea ma faafou o latou faalogona faaleagaga.

Ia tofi se tasi e faia le tatalo faaii.



## SAUNIA E ULUFALE ATU I LE MALUMALU PAIA

*“Afai foi e atiina  
ae ia te au e lou  
nuu se fale i le  
igoa o le Alii, ma  
le faatagaina se  
mea eleelea e oo  
atu i ai, ina ia le  
faaleagaina ai,  
o le a i ai i lea  
mea lou mamalu”  
(MFF 97:15).*

### FAAMOEMOEGA

Ina ia saunia tagata o le vasega e ulufale atu ma le agavaa i le malumalu.

### TUUINA ATU O LE LESONA

Tofi se tasi e faia le tatalo amata.

Fesili atu i le vasega pe i ai ni fesili. Ia faaalu le taimi e manaomia e tali ai fesili i le mea sili e te mafaia ma e pei ona taitaiina ai e le Agaga o le Alii. Ia manatua o nisi vaega o galuega faalemalumalu e le tatau ona talanoaina i fafo o le malumalu.

### E TATAU ONA SAUNIA TAGATA TAITOATASI MO LE MALUMALU

Ia faamalamalama atu faapea ua i ai i tagata taitoatasi le tiutetauave e faia ai mea na o le a taitaiina atu ai i latou i le mauaina o faamanuiaga atoatoa o le malumalu.

Ia talanoaina faapuupuu manatu ia e lima. E tofu le manatu ma se auala e tatau ai ona tatou saunia e ulufale atu i le malumalu. Atonu e te manao e tusia mea taitasi i luga o le laupapa ao outou talanoaina.

1. E tatau i tagata taitoatasi ona agavaa.

Fai atu i tagata o le vasega e faitau le Mataupu Faavae ma Feagaiga 97:15–17.

- O le a le mea o loo aoao atu e lenei fuaitau ia te oe e uiga i le taua o le agavaa pe a ulufale atu i le malumalu?

Ua talosagaina i tatou e Peresitene Howard W. Hunter ina ia mafaufau i “uiga ma amioga amiotonu lea na faasino mai e le Alii ia i tatou i le fautuaga sa Ia tuuina atu i le Au Paia i Katelani e ala mai i le Perofeta o Iosefa Samita, a o saunia i latou e fauina se malumalu.”

O leni fautuaga o loo maua i le Mataupu Faavae ma Feagaiga 88:119. Fai i tagata o le vasega e faitau le fuaiupu leni.

Ia fai atu foi i le vasega e mafaufau foi i le fesili na tuuina mai e Peresitene Hunter: “Pe o nei ea uiga ma amioga ua atagia moni atu ai mea ua tatou taufai faananau ma saili i ai?” (“O le Faailoga Maoae o lo Tatou Auai i le Ekalesia,” *Liahona*, Nov. 1994, 3–4).

## 2. E tatau i tagata taitoatasi ona lotomauualalo.

E tatau i tagata taitoatasi ona ulufale atu i le malumalu ma le lotomauualalo, faatasi ma se faanaunauga ina ia aoaoina mai luga.

- Aisea ua taua tele ai le lotomauualalo ao tatou auauna atu ma aoao i totonu o le malumalu?

Fai atu i tagata o le vasega e faitau le Mataupu Faavae ma Feagaiga 136:32–33.

- O le a se mea ua aoaoina mai e lenei fuaitau e uiga i le taua o le lotomauualalo? E mafai faapefea ona e faaaogaina lenei fautuaga i le auai atu i le malumalu mo le uluai taimi?

## 3. E tatau i tagata taitoatasi ona malamalama o le mauaina o sauniga o le malumalu ma feagaiga e taua mo le mauaina o le ola e faavavau.

Ua saunoa mai Peresitene Harold B. Lee: “O sauniga faalemalumalu ua fuafuaina e se Tama Faalelagi atamai o le na Ia faailoa mai ia mea ia i tatou i aso nei e gata ai, e fai ma taiala ma puipuiga i o tatou olaga atoa, ina ia [le misia ai le avanoa] e oe ma au e maua ai le faaeaga i le malo selesitila, lea e afio ai le Atua ma Keriso (“Enter a Holy Temple,” *Improvement Era*, Iuni 1967, 144).

*“Ia outou faatulagaina; ia saunia mea tatau uma; ma faatuina se fale, o se fale o le tatalo lea, o se fale o le anapogi, o se fale o le faatuatua, o se fale o le aoaoga, o se fale o le mamalu, o se fale o le tulaga maopoopo atoatoa, o se fale o le Atua” (MFF 88:119).*

Ua saunoa mai Peresitene Iosefa Filitia Samita: “O nei faamanuiaga ua folafolaina mai ia i tatou, e ala mai i lo tatou faamaoni, o le penina tautele lea ua tuuina mai e le Alii ia i tatou, aua o faamanuiaga silisili nei e mafai ona tatou mauaina i lenei olaga. O se mea matagofie tele le oo mai i totonu o le Ekalesia, ae peitai e le mafai ona e mauaina le faaeaga seiloga ua e osifeagaiga i totonu o le maota o le Alii ma maua ki ma le pule ua tuuina mai ai iina, ma e le mafai lava ona tuuina mai i se isi lava nofoaga o le lalolagi i aso nei” (*Doctrines of Salvation*, tuufaatasia Bruce R. McConkie, 3 voluma [1954–56], 2:253).

## 4. E tatau i tagata taitoatasi ona malamalama i le taua o le ofuina o le ofusa o le malumalu.

Ia faamalamalama atu faapea o i latou ua auai atu i le sauniga o le malumalu ua faamanuiaina i lo latou ofuina lea o le ofusa o le perisitua paia. I se faamatalaga na tuuina mai i le Ekalesia, na saunoa mai ai le Au Peresitene Sili:

“O tagata o le Ekalesia o e ua faaofuina i le ofusa i totonu o le malumalu ua latou osia se feagaiga ina ia ofuina i o latou olaga atoa. Ua faaliliuina lea faapea ina ia ofuina i totonu i le ao atoa ma le po. . . .

“O le mataupu faavae o le tatau lea ona laeiina o le ofusa ae le o se sailia o ni tulaga e aveeseina ai. . . . Afai e tatau ona aveeseina le ofusa, . . . e tatau ona toe vave ofuina i se taimi vave lava.

“O mataupu faavae o le tumama ma le ufiufiina faalelei o le tino ia talafeagai, o loo faailoa mai i le feagaiga ma e tatau ona puleaina le natura o laei uma e laeiina. E laeiina e tagata o le Ekalesia ua maua faaeega paia le ofusa e avea o se faamanatu o feagaiga paia na latou osia ma le Alii ma o se puipuiga foi e tetee atu ai i faaosoosoga ma mea leaga. O le auala e laeiina ai o se faailoga vaaia lea i fafo o se tautinoga i totonu ina ia mulimuli i le Faaola” (Tusi a le Au Peresitene Sili, 10 Oke. 1988).

5. E tatau i tagata taitoatasi ona saunia mo tapuaiga paia faaletagata lava ia.

I totonu o le malumalu, ao lei amataina, ma ao faia foi, ma pe a maea sauniga, e i ai avanoa mo se tagata e mafaufau loloto ai ma faalatalata atili atu ai i le Tama Faalelagi ma Iesu Keriso. E tofu tagata ma fesili e tatau ona taliina, faatasi ma avega e tatau ona faamamaina, o faafitauli e tatau ona foia. E toatele ua latou faaaogaina le malumalu o se nofoaga e sola ese ai mai le lalolagi ma fesootai ma le Tama Faalelagi. E toatele ua latou mauaina ia tali, o le filemu, ma le olioli i totonu o le malumalu.

Na saunoa mai Peresitene Ezra Taft Benson: “O malumalu o nofoaga ia o faaaliga faaletagata. Pe a mafatia lou loto i se faafitauli po o se mea faigata, ou te alu i le Maota o le Alii ma se tatalo i lou loto mo ni tali. O nei tali ou te mauaina i ni auala manino ma e le mafaaseseina” (“O le Mea Ou Te Faamoemoe O Le A E Aoao Atu i Lau Fanau e uiga i le Malumalu,” *Liahona*, Ape. 1986 4).

Ia faamalamalama atu faapea o totonu o le malumalu, e mafai ona tatou tuuina atu ai igoa o i latou e i ai ni manaoga faapitoa ina ia mafai ai e i latou e auai atu i le malumalu ona tuufaatasia lo latou faatuatua ma tatalo mo nei tagata.

### **O SAUNIUNIGA FAAPITOA MO LE TAIMI MUAMUA I LE MALUMALU**

O le a fesoasoani nei faamatalaga i tagata taitoatasi e faia ai sauniuniga uma e tatau ai mo le uluai taimi i le malumalu ma ia mautinoa ai o lenei asiasiga o le a matuai faagaetia. Ia talanoaina ma lau vasega le faamatalaga e talafeagai ma o latou tulaga.

1. *Pepa Faataga o le Malumalu.* Ia maua se pepa faataga o le malumalu. Ia mautinoa e te alu ma ave lou pepa faataga i le malumalu, talu ai e na o i latou e i ai pepa faataga aoga e mafai ona ulufale atu. A o e ola agavaa ai, o le a faatagaina oe e le pepa faataga ona e ulu atu i soo se malumalu o le Ekalesia i soo se taimi e te mana'o ai i le isi lua tausaga. Ina ia faafouina lou pepa faataga o le malumalu, e tatau ona faatalanoaina oe e se tasi o lau au epikopo po o le au peresitene o le paranesi ma se tasi o lau au peresitene o le siteki po o le misiona.

2. *Fuafuaina ma le Faatulagina o le Taimi e Malaga Atu ai.* Ae te lei alu atu i le malumalu mo le mauaina o le faaeega paia po o le sauniga o le faamauga, ia telefoni atu i le malumalu e faatulaga ai sou avanoa. Ia fesili pe o le a le taimi e tatau ona e taunuu ai i le malumalu ma pe o le a foi le umi ua fuafua e te nofo ai. Ia fesili atu mo se fesoasoaniga tau faamatalaupu pe a manaomia.
3. *Fuafuaga mo Femalagaaiga.* Afai e mamao le mea e te nofo ai mai le malumalu, e tatau ona e mafaufau i mea nei:
  - Ia vave fai fuafuaga mo femalagaaiga, mea e nofo ai, ma meaai. Atonu e sili ia te oe le malaga faatasi ma se vaega o tagata pe a mafai.
  - Afai e talafeagai, ia faia ni fuafuaga e sui au tupe i tupe a le atunuu o loo i ai le malumalu.
  - Ave ia lava ni tupe e totogi ai mea uma e tatau ona faaoga. Atonu e te manaomia le faatauina o nisi ofusa, totogi le faaogaina o ofu o le malumalu, ma totogi ai le mea e te nofo ai ma femalagaaiga. (Ia manatuaina e le maua i le tele o malumalu ia laei e totogi lona faaogaina e. Ua uunaia e le Au Peresitene Sili ia tagata uma o le Ekalesia ina ia faatau o latou lava laei o le malumalu.)
4. *Laei.* Ia fuafua e laei e pei o loo e auai i sauniga i le Aso Sa. E le tatau i tamaitai ona ofuina atu ni ofuvae i le malumalu.
5. *Tagata Faafeao.* O i latou uma faatoa o atu i le malumalu mo le uluai taimi, e tatau ona i ai se tagata faafeao la te o faatasi. O lenei tagata faafeao e mafai ona o se tagata o le aiga, po o se uo o le ituaiga e tasi ma o se tasi ua uma ona alu i le malumalu, po o se tasi o tagata faigaluega i le malumalu e mafai ona fesoasoani atu. O tagata faigaluega i le malumalu latou te ofoina atu fesoasoani faaleuo i taimi uma.
6. *Galuega o Faamauga.* Afai e te fuafua e faia sauniga mo ou tuua ua maliliu, e tatau ona e alu ma ave i le malumalu ia vaega o talafaamaumau o aiga. Afai e fia faamauina oe ma lou toalua pe faamauina foi le fanau ia te oulua, e tatau ona i ai lau vaega o le talafaamaumau o lou lava aiga. Afai o le a faaipoipoina oulua, o le a moomia ona oulua usitaia ia tulafono uma a le malo ma ia oulua aumaia se laisene fai faaipoipoga o loo aoga. Ia faitau ma le faaeteete le *O se Taiala a le Tagata o le Ekalesia i le Galuega Faalemalumalu ma Talafaaoslopito Faaleaiga (34697)* mo nisi faamatalaga auiliili e uiga i le auala e maua ai sauniga o le malumalu mo e o soifua ma e ua maliliu. E mafai foi ona e faafesootaia le tusi faamau tala o le malumalu o loo e fuafua e te malaga i ai.

*“O sauniga  
faalemalumalu  
ua fuafuaina e se  
Tama Faalelagi  
atamai . . . ina  
ia [le misia ai le  
avanoa] e oe ma  
au e maua ai  
le faaeaga i le  
malo selesitila”  
(Peresitene Harold  
B. Lee).*

7. *Vaaiga o Fanau.* Afai e o mai tamaiti i le malumalu mo se sauniga o le faamauga, o le a vaaia i latou i le potu o le malumalu mo le autalavou seia oo i le taimi e o atu ai i latou tou te faatasi i le potu o faamauga. O le a tuuina atu ofu papae o tamaiti mo le sauniga. A maea le sauniga o le faamauga, o le a latou toe foi atu i le potu e faatalitali ai mo oulua. E leai se vaavaaiga e tuuina atu i le malumalu mo tamaiti e le o aafia i se faamauga.
8. *Ofusa o le Malumalu.* E tatau ona faatau sau pea ofusa o le malumalu se tasi po o se lua ae e te lei ulufale atu i le malumalu. Aua nei e ofuina ae e te lei alu i le malumalu. A maea ona e mauaina lou faaeega paia, ma ua malie lou loto i le lapoa ma le ituaiga, ona mafai loa lea ona e faatauina nisi ofusa faaopoopo. O nisi tagata e mananao e ta muamua le uluai pea o ofusa, ina ia mautinoa ai e ofi lelei ao lei faatauina nisi ofu. O ofusa o le malumalu e gaosia e le Ekalesia ma e mafai ona faatau i Faletusi a le Ekalesia.
9. *Laei o le Malumalu.* Ua fautuaina e le Au Peresitene Sili ia tagata o le Ekalesia ina ia faatau ma faaoga o latou lava laei o le malumalu. I nisi malumalu e mafai ai ona faaogaina laei o le malumalu i sina tau itiiti, ae e manaomia lava le i ai o laei o le tagata lava ia ma ia tausia faalelei o latou lava laei e faaoga i le malumalu. E mafai e le epikopo po o le peresitene o le paranesi ona tuuina atu ni faamatalaga e uiga i le nofoaga e mafai ona faatauina ai nei laei.  
  
E mafai e tuafafine ona ofuina o latou ofu faaipoipo mo a latou faaipoipoga i le malumalu, peitai e tatau ona paepae le ofu, ia uumi lima, ia lelei le fua ma le ie, ia leai se veli umi e toso mai tua, ma ia le papanu ni ona teuga.

#### FAAIUGA

Ia fetufaai atu lau molimau i le paia o galuega faalemalumalu. Ia faailoa atu lou fiafia i lou vaavaai atu i tagata o le vasega o loo sauni e ulufale atu i le malumalu.

Tofi se tasi e faia le tatalo faaiu.

A uma lenei lesona, e tatau i tagata o le vasega ma faiaoga ona auai atu faatasi i le malumalu pe a mafai ai.



## IA FAAUAU PEA ONA OLIOLI I FAAMANUIAGA O LE AUAI I LE MALUMALU

*“Aua faauta, ua  
ou talia lenei fale,  
o lou igoa foi o le a  
iinei ma o le a ou  
faaali au lava i  
lou nuu i le alofa  
mutimutivale i  
lenei fale”  
(MFF 110:7).*

### FAAMOEMOEGA

Ina ia tuitatao le uluai asiasiga a tagata o le vasega i le malumalu ma fesoasoani ia i latou ina ia saunia e fafia i le malumalu i o latou olaga atoa.

### SAUNIUNIGA

1. Ia saunia e avea lenei lesona ma taimi o fetufaaiga. O le toatele lava o le vasega o le a mananao e talanoaina a latou uluai asiasiga i le malumalu.
2. Tofi se tasi o le vasega e saunia e faitau le Mataupu Faavae ma Feagaiga 110:1–10 ma fetufaa mai ona lagona e uiga i lea mau.
3. Tofi se tasi o le vasega e ootoo mai faamatalaga e uiga ia Elia o loo i le *Saunia e Ulufale Atu i le Malumalu Paia*, itulau 23–24.
4. Ia saunia e tali fesili atonu e tulai mai i le uluai asiasiga i le malumalu, ae aua nei talanoaina fesili po o faamatalaga ia e tatau ona faapolopolo mo na o totonu lava o le malumalu e talanoaina ai. A tulai mai ni fesili faapea, ona fuafua lea o se isi asiasiga e o faatasi ai i le malumalu.

### TUUINA ATU O LE LESONA

Tofi se tasi e faia le tatalo amata.

Fesili atu i le vasega pe i ai ni fesili. Ia faaalu le taimi e manaomia e tali ai fesili i le mea sili e te mafaia ma e pei ona taitaiina ai e le Agaga o le Alii. Ia manatua o nisi vaega o galuega faalemalumalu e le tatau ona talanoaina i fafo o le malumalu.

### FAATUMAUINA O SE ALOFA MO AUAUNAGA I LE MALUMALU

- O le a sou lagona ao e i ai i totonu o le malumalu?

Ia faamalamalama atu faapea o auaunaga i le malumalu o le a aumaia ai pea lava pea faamanuiaga i olaga o i latou e malaga soo i le malumalu. Ia tau atu i le vasega e faapea a o fou pea i o latou mafaufau lo latou i ai i le malumalu, atonu latou te mananao e tusi i lalo o latou lagona i totonu o a latou tusi o talaaga o le olaga. Ia



faamanatu atu ia i latou e faapea, e ui lava ina mafai ona latou tusia o latou lagona, ae le tatau ona latou tusia nisi o faamatalaga o galuega faalemalumalusa, lea e le tatau ona talanoaina i fafo o le malumalu.

- O le a se mea e mafai ona e faia e faatumauina ai se fiafia mo auauunaga i le malumalu i lou olaga atoa?

Ia tusi manatu o le vasega i luga o le laupapa. Atonu e te manao foi e tuuina atu manatu nei:

1. Ia mafaufau loloto i aso taitasi i ou aafiaga i le malumalu.

Ia faamalamalama atu faapea, o nisi tagata e tele atu avanoa latou te asiasi atu ai i le malumalu nai lo isi. Ae peitai, o le taimi lava tatou te o ai i le malumalu ma lagonaina le Agaga iina, e tatau ona i ai se avanoa i aso taitasi e mafaufau loloto ai i sauniga o le malumalu ma toe tomanatu ai i feagaiga na tatou osia. O le faia o lenei mea o le a uunaia ai i tatou i aso taitasi e mafaufau ma galulue i ni auala e sili atu ona amiotonu.

O le a le mafai ona tatou manatuaina uma mea e uiga i le malumalu, ae e tatau ona tatou taumafai e manatua mea uma e mafai ona manatua pe a maea le asiasiga muamua. E tatau foi ona tatou suesue i tusitusiga paia ma saunoaga a perofeta e faatatau i malumalu. O nisi o nei vaega ua tuuina atu i lenei vasega.

Atonu e te manao e ootoo mai e se tasi o le vasega le faamatalaga o loo maua i le itulau e 10 i le *Saunia e Ulufale Atu i le Malumalu Paia*:

“O le a e le malamalama atoatoa i le sauniga i le malumalu i le taimi muamua. Na o se vaega o le a e malamalama i ai. Ia e toe foi atu pea lava pea i ai. Toe foi atu e aoao. O mea ua fai ma faafatiatamai ia te oe, po o mea ua e iso ai, po o mea e te lei malamalama i ai o le a faaalua atu ia te oe. . . .

“Afai e te maua le avanoa e auai atu ai i se sauniga o le faaeega paia i totonu o le malumalu po o le molimauina o se faamauga, mafaufau loloto i le uiga o mea o le a e silasila atu i ai o loo faatinoina. Ma afai e mavae lena asiasiga ma teuina pea na mea i lou mafaufau; o lou iloiloaina ma le faaeteete ma le agaga tatalo o le a e iloaina ai le faateleina o lou malamalama.

“O se tasi o aoga sili ona taua o aafiaga e oo i ai i le malumalu, o le maua ai lea o se vaega aoao o fuafuaga a le Atua e faatatau i lenei lalolagi. Afai e uma ona tatou ulu i le malumalu (ma e mafai ona tatou toe foi atu e toe faamanatu) o le a tatou iloa ua tonu ma talafeagai lelei lava le gasologa o le soifuaga, ma le ata faataatia o mea uma lava. Ona tatou iloa ai lea le tulaga o loo tatou i ai, ma o le a mafai ona vave ona tatou iloa pe a tatou sese ese mai le ala sao.”

2. Ia manatua o le totonugalemu o tapuaiga uma i le malumalu o le Faaola, o Iesu Keriso.

Ua aoao mai i tusitusiga paia e faapea o se lesona taua mo le fausiaina o malumalu “ina ia maua e le Atalii o le Tagata se mea e faaali mai ai o ia lava i lona nuu” (MFF 109:5). O faatusa ma sauniga o le malumalu e fesoasoani tatou te taulai atu ai i le Faaola.

Ia faamalamalama atu faapea o le Faaola na faaali mai o ia lava i le Malumalu i Katelani. Na faaali o Ia ia Iosefa Samita ma Oliva Kaotui e taliaina le malumalu e avea ma Ona maota. O lenei asiasiga o loo tusia i le Mataupu Faavae ma Feagaiga 110:1–10. Fai atu i le tagata o le vasega na tofia e faitau ma fai mai sana faamatalaga e uiga i lea fuaitau.

- O a faamanuiaga na folafola atu e le Faaola ia i latou o e fausia ma auai atu i le malumalu?

**O TOTONU O MALUMALU, E FAAMAU FAATASI AI AIGA MO LE FAAVAVAU**  
Fai atu i tagata o le vasega e faitau le Malaki 4:5–6.

Fai atu i le tagata na tofia o le vasega e ootoo mai le faamatalaga e uiga ia Elia o loo maua i le *Saunia e Ulufale Atu i le Malumalu Paia*, itulau 23–24.

Ia faamalamalama atu faapea na toe foi mai Elia ma toefuatai mai ki o le perisitua lea ua mafai ai e aiga ona faamauina faatasi i totonu o malumalu mo le faavavau.

Ia toe iloilo e le vasega le Mataupu Faavae ma Feagaiga 110:13–16. Ona fai atu lea i se tasi o le vasega e faitau mai le faamatalaga o loo i lalo, o loo maua i le itulau e 28 i le *Saunia e Ulufale Atu i le Malumalu Paia*:

“Na amata mai lava i lena aso, le aso 3 o Aperila o le 1836, ona liliu atu loto o fanau i o latou tama. Na amata mai ai iina ona tumau ia sauniga ae ua le mo na o se taimi. Ua i ai le mana o faamauga ia i tatou. O lena mana ua mafua ai ona ia i se aoga ma tumau ai e faavavau ia sauniga uma e faia i le pule tonu mo e o soifua ma e ua maliliu.”

Na faamalamalamaina mai e le Faaola le mana o faamauga ina ua Ia fetalai atu i Lana Aposetolo o Peteru, e pei ona tusia i le Mataio 16:19. Tuu atu i le vasega e faitau le fuaiupu lenei.

Ia faamalamalama atu o ki lava foi nei o loo umia i aso nei e le perofeta ma le Peresitene o Ekalesia. “O lena mana paia e faamau ai o loo i ai nei i le Ekalesia. E leai se mea e faatusalia lona paia pe a mafaufau i ai i latou o e iloaina le taua o lenei pule. E leai se mea e sili atu ona fusia faatasi ai. E toaitiiti lava alii ua umia lenei mana e faamau ai i soo se vaitaimi o le lalolagi—i totonu o malumalu taitasi e i ai ni alii o e ua

tuuina atu i ai le mana e faamau ai. E leai se tasi e mafai ona mauaina sei vagana ua maua mai le perofeta, tagatavaai, ma le tali faaaliga ma le Peresitene o le Ekalesia a Iesu Keriso o le Au Paia o Aso e Gata Ai, pe mai ia i latou o e ua ia faasafuaina atu i ai ina ia tuuina atu i isi” (*Saunia e Ulufale Atu i le Malumalu Paia*, 24, 26).

Ia faamalamalama atu o sauniga o faamauga e aofia ai le faamauina o se tane ma se ava o le tasi i le isi ma le faamauina o matua i fanau. Pe a faamauina matua i le malumalu, o fanau e fananau mai ia i laua e fananau mai i totonu o le feagaiga o le faamauga a o latou matua ma e le toe tau faamauina i o latou matua.

- O le a sou manatu e mafai faapefea e le faamauina faatasi i totonu o le malumalu ona aafia ai manatu ma mea e fai a se aiga i aso taitasi?
- O a faamanuiaga e te manatu e oo mai i se aiga ona o la latou faamauga i le malumalu?

Ua saunoa mai Peresitene Gordon B. Hinckley: “Pe i ai ea se alii e alofa ma le faamaoni i se tamaitai, po o se tamaitai e alofa ma le faamaoni i se alii, e lei tatalo ina ia faaauau la laua mafutaga i tua atu o le tuugamau? O i ai ea se tamaitiiti na tanumia e ni matua e le o moomoo mo se faamautinoaga o le a latou toe mafuta ma le e pele ia i laua i se lalolagi o le a oo mai? Pe mafai ea e se tasi e talitonu i le ola e faavavau ona masalosalo faapea o le a aumaia e le Atua o le lagi i ona atalii ma ona afafine lena uiga aupito taua o le olaga, o le alofa lea e faaalua lona uiga sili ona aanoa i fegalegaleaiga faaleaiga. E leai, o le mafaufau lelei e moomia ai le tatau ona faaauauina pea ia sootaga faaleaiga i talaatu o le oti. E moomoo i ai le loto o le tagata, ma ua faaalua e le Atua o le lagi se auala e mafai ai ona faamautinoaina. E maua i sauniga paia i le maota o le Alii” (“Why These Temples?” *Temples of The Church of Jesus Christ of Latter-day Saints* [1988], 4).

#### **UA AUMAIA E MALUMALU IA I TATOU AVANOA E AUAUNA ATU AI IA I LATOU UA MALILIU**

Tuu atu i tagata o le vasega e faitau le Opetiaia 1:21.

Ua faamatala mai e le Perofeta o Iosefa Samita le ala e mafai ai e tagata o le Ekalesia ona avea ma faaola i le Mauga o Siona:

“Ae e faapefea ona avea le [Au Paia] ma faaola i le Mauga o Siona? E ala i le fausiaina o o latou malumalu, faatutuina o a latou vai papatiso, ma o atu ina ia mauaina sauniga uma, papatisoga, faamauga, mulumuluga, faauuga, faauuina ma mana o faamauga i luga o o latou ulu, mo o latou augatuaa ua maliliu, ma togiolaina i latou ina ia latou tutu mai i le uluai toetutu ma faaeaina i nofoalii o le mamalu faatasi ma i latou; ma o le filifili lea e noatia ai loto o tama i fanau, ma fanau i tama, lea ua faataunuina ai le misiona a Elia” (*History of the Church*, 6:184).

*“O lenei galuega ua faataunuuina mo isi tagata o e ua maliliu, i totonu o o tatou malumalu e tatau ona faataunuuina i le agaga lava e tasi o le gauai ma le le manatu faapito lea sa faamaonia i le soifuaga o le Matai” (Peresitene Thomas S. Monson).*

Ia faamalamalama atu faapea o se vaega o Lana ata o le faaolataga, ua saunia ai e lo tatou Tama Faalelagi se ala mo i latou ua maliliu e aunoa ma le mauaina o o latou sauniga faaola o le talalelei ina ia maua ai nei sauniga. O tagata o loo i le lalolagi o agaga e maua le avanoa e faalogo ai i le talalelei. E mafai ona latou taliaina iina, ae peitai e le mafai ona latou mauaina sauniga o le talalelei mo i latou lava. Ua poloaiina i tatou e le Alii ina ia faia nei sauniga mo i latou i totonu o malumalu paia. E tatau ona tatou faia ni taumafaiga faapitoa e faia ai galuega o talafaasolopito o aiga, ina ia mafai ona tatou maua sauniga e aveva ai ma sui o o tatou lava augatuaa.

O sauniga mo e ua maliliu e faia i totonu o malumalu e aofia ai papatisoga, faamauga, faauuina i le perisitua, faaeega paia, ma le faamauina o le tane i le ava ma matua i fanau.

E ao ona tatou toe foi soo atu i le malumalu pe a talafeagai ai ma tulaga o tatou i ai, ina ia mafai ona tatou auauna atu mo i latou o e ua maliliu e ala i le faia o sauniga mo i latou. O le a tatou faamanuiaina olaga o i latou tatou te auauna atu i ai ma faamanuia ai foi o tatou lava olaga. O faamatalaga e uiga i le ala e faia ai sauniga mo e ua maliliu o loo maua i le *O se Taiala a le Tagata o le Ekalesia i le Galuega Faalemalumalu ma Talafaasolopito Faaleaiga* (34697).

Ua saunoa mai Peresitene Thomas S. Monson:

*“O se talisapaia mo faaeega paia o le malumalu ma sauniga o faamauga o le a tuufaatasia ai tagata o o tatou aiga ma o le a maua ai e tagata taitoatasi o le aiga se loto naunau ia maua foi nei lava faamanuiaga e i latou ua maliliu o e pele ia i latou. . . .*

*“O lenei galuega o loo faia i o tatou malumalu mo isi, e ao ona faataunuuina i le agaga lava e tasi o le naunautai ma le le manatu faapito ma le taulagaina e atagia ai le soifuaga o le Matai. Afai tatou te manatuaina o ia, e faigofie foi ia i tatou ona tatou faia a tatou lava vaega i lenei galuega taua. O taimi uma lava tatou te tepa atu ai i nei maota paia, ia tatou manatua avanoa o le faavavau o loo maua ai i totonu, e le gata mo i tatou lava, ae faapea foi e ua maliliu” (Pathways to Perfection [1973], 206–7).*

#### FAAIUGA

Ia faamamafa atu faapea o le auai atu i le malumalu e mafai ai ona tatou auauna atu i isi ma faaaauai ai ona tatou mauaina le malamalama faaleagaga. Ia fetufaai atu le faamatalaga o loo i lalo:

*“E leai lava se isi galuega e puipuia atoatoa ai le Ekalesia nai lo galuega faalemalumalu ma le suega o gafa lea e lagolago atu i ai. E leai se isi galuega e sili atu le faaleagaga e maua ai. E leai lava se isi galuega tatou te faia tatou te maua ai le mana e sili atu le malosi. E leai se isi galuega e tatau i ai le amiotonu a’ia’i. . . .*

“Afa tatou te talia le faaaliga e faatatau i galuega o sauniga o le malumalu, afa tatou te osia ia feagaiga e aunoa ma le masalosalo, o le a puipuia i tatou e le Alii. O le a tatou maua musumusuga e tatau ai mo luitau o le soifuaga. . . .

“O lea, o mai i le malumalu—o mai e ave o outou faamanuiaga. O se galuega ua paia” (*Saunia e Ulufale Atu i le Malumalu Paia*, 37).

Ia faaiu le lesona i le fetufaai o molimau. Uunai le vasega e toe foi soo atu i le malumalu ina ia aoaoina ai i latou e le Agaga o le Alii.

Atonu e te manao e faailoa atu faapea e mafai e tagata o le vasega ona maua mai le faletusi tutotonu o le Ekalesia ma matamata ai i o latou fale le ata vitio o le *Mountain of the Lord* (53300). O leni ata e 73-minute le umi o loo faamatalaina ai le tala i le fausiaina o Malumalu o Sate Leki.

Tofi se tasi e faia le tatalo faaiu.

O LE EKALĒSIA A  
**IESU KERISO**  
O LE AU PAIA O ASO  
E GATA AI

SAMOAN



4 02368 54890 1

36854 890